

KRAUTH RHEINISCHES LUTHERAN THEOLOGICAL SEMINARY  
MT. AIRY, PHILADELPHIA

Wie man das volck zur

Büß / vnd ernstlichem gebet wi-  
der den Türcken auff der  
Cantzel vermanen sol.

Sambt einer vnterricht vom gebet /  
Vnd einer kurtzen außlegung des  
LXXIX. Psalmen.

Durch Vitum Dietrich /  
zu Nuremberg Prediger.

1 5 4 2.





00006  
\* 20006  
157

THE  
LIBRARY  
OF THE  
MUSEUM OF  
ART AND  
ARCHAEOLOGY  
OF THE  
UNIVERSITY OF  
CAMBRIDGE

1842



# Ein kurtze vermanung

zum gebet wider den Türcken/  
für die einfeltigen Pharisäern.

**I**ederman weisß / wie nun etliche  
Jar bey vnserm gedencen / der Türck ye  
lenger ye neher zu vns gerückt / vnd ymmer  
dar jerlich mehr schadens der Chriſtenheit  
hat zugefüget. Aber ſunderlich yetz den  
nechsten Sommer / hat er das Vngerlandt  
erobert / das es nit mehr das vngerlandt /  
sonder ein Türckey iſt / ſintemal der Türck daſelb ge  
waltig herſchet / vnd ſchier alles ynnen hat. Weylnun  
an dem kein zweyffel iſt / wo wirs mit vnſern Sünden  
nit hetten verſchuldet / der Gotloſe feindt wurde wider  
vns nit ſo vil glück habē / Derhalb iſt es hoch von nöte /  
das wir ſolchs vnſerer nachbarn exempel vns laſſen  
ein warnung ſein / vnd wie ſie mit iren ſünden ſölche  
ſtraff verdienet / dz wir an irem jamer lernen / erſtlich  
vnſer leben beſſern / vñ vns zu einer rechtē Chriſtlichen  
buß ſchicken / denn wo wir in ſünden fortfaren / vñnd  
vns nit beſſern wollen / müſſen wir vñnd vnſere Kinder  
in der warheyt eben der gleichen ſtraff vnd zorns von  
Gott gewarten.

Zum andern müſſen wir auch mit ernſt betten / vñnd  
vmb vergebung der ſünden vñnd abwendung der ver  
dientē ſtraff zu Gott rüffen / den / alſo leret vns Gott ſelb  
vnd ſpricht. Küſſemich an in der nott / vnd ich wil dich

a 2

erhö



erhöre vñ du würdest mich preysen. Vñ Christus spricht  
Johan. 16. Was jr den vatter bitten werdt in meynem  
namen/das wirdt er euch geben. Sölchen befelch vñd  
zusagung vñsers Gottes/sollen wir zu hertzen nemen/  
vñd in allen nöten/sonderlich aber yetz wider dē Türckē  
en vmb hilff bitten/den er ist ein solcher feindt/der nit  
allein gelt vñd güt/weyb vñd kind/leiß vñd leben raus  
bet vñnd auff das gewlichst mit den leuten vmbgeht/  
sonder alle sein achten vñd trachten geht dahin/wie er  
den namen Christi/außrotte/vñd seynen Teuffel/den  
Mahomet/an die stadt setze. Wo nū der glawb an Chri  
stum/die predig/Sacramēt/vñd der rechte Gottes dienst  
hin weg ist/da ist auch die ewige seligkeyt hinweck/vñd  
nichts gewissers/denn das ewige verdammus vñnd  
das hellisch fwer. Derhalb haben wir sondere vñnd  
hochdringende nott/wider solchen feind zu bitten/das  
Gott jm wehren/vns für jm behüten/sein wort nit von  
vns nemem vñnd vns nit zū Türcken wölle lassen wer  
den. Solchs gebet/will gott vmb seines namens willen  
erhören/vñd vns helfen/so fern es vns ein rechter ernst  
ist. Aber wie vor gemeldet/so muß bey solchem gebett  
auch ein rechte buß vñd besserung sein. Wir müssen nit  
so mutwillig vñnd freuel sein. Müssen nit also geytzen  
vñd allein für vns sorgen/wie wir reich werden. Wir  
müssen gegen den armen barmhertzig/vñnd gegen  
yderman freundtlich sein/vñnd trewlich handeln/vñd  
für allem ergernus/sonderlich für dem Gotslestern/  
fressen/saußen/vñd all ander vnzucht vns hüten. Den  
vmb solcher sünd willen kombt der zorn gottes vber die  
vngheorsamen kinder/wie Paulus sagt. Wir müssen  
Gottes wort nit verachten/sonder dasselbe dermassen  
hörē/auff dz wir vns alles des abthün/so vns von Got  
verbot



verbotten ist/vñ vns fleissen wz vns von im gebottē ist/  
solche besserung soll folgen/so anderst die straff auffhō-  
ren vnd vns gnad widerfaren soll.

Derhalben hab yederman auff sein eygē leben gute  
achtung/vñnd schaw ober sich auch allenthalß wie ein  
Christ halte. Befindet man/das mans nit hat thūn/so  
hōre man auff/vñnd heb noch an sich zu bessern / bitte  
ymb gnad/vnd hoffe/Gott werde durch den Herrn Chri-  
stum vns vnser sündt vergeben/vnd die straffen gnedig  
abwenden.

In sonderheyt/weyl das ganze Reich yetzund in  
mechtiger rüstung/wider sollichen feindt den Türcken  
ist/sind wir schuldig für alle die zū betten so zū sollichem  
werck sich brauchen lassen/das jnen Gott/gnedigen syg-  
geben / dem gewlichen feindt wehren / vnd sein arme  
Christenheyt befriden wolle / Amen. Bettet ein Vater  
vnser.



# Ein ander vermanung

zur besserung/ vnd gebet wider den  
Türcken/et was lenger gestellt.



**S**ehen ewer  
lieb/ was für greulichs  
jammer dise jar her/  
des Türcken halb in  
Vngern vñ Teutschen  
land sich hat erhaben/  
Das wir so vil land/  
leut/ geschutz/vorrat/  
vnd anders verloren/  
vnd der feind jmer je

neher kōmen/ vnd wir dest mehr sind bedranger worden/  
vnd noch heutigs tags/ je lenger je mehr furchtē müssen.

Nun wissen wir zum teyl selb/ warumb solcher iamer  
vber vns/ von Gott ist verhenget worden. Denn wie  
Teuschland das heylig Euangelium gehalten hab/ ist  
vor augen. Rechte Prediger hat man nit wollen leiden/  
hat sie veriagt/ gefangen/ gewürget/ vnd die leut mit ge  
walt/ wider ire eigne gewissen/ zu einerley gestalt des  
Sacraments/ vnd vnzelich vil Abgöttereyen trieben.  
Wie es aber Gott gefalle/ wo man sein wort dermassen  
vbel halten/ vnd von abgötterey nit ablassen will/ sihet  
man sein allenthalb im Alten Testamēt/ vñ sonderlich  
im 36. Cap. des andern teyl der Chronick/ da also stehet.

Der



Der Herr jrer Väter Gott/ sandte zu inen durch  
seine botten früe/denn er schonete seines volcks/ vnd sei-  
ner wonung/ Aber sie spotteten der botten Gottes/ vnd  
verachtete seine wort/ vnd effeten seine Propheten/bis  
das der grīm des Herrn vber sein volck wuchs/ das kein  
heylen mer da war. Denn er füret vber sie den König  
der Chaldeer/ vnd ließ erwürgen jr iunge manschaft/  
mit dem schwerdt ic.

Hie horen wir/das der Herr gern schonen wolt/vñ  
nit lust hat die seinen zu verderben. Vnd eben vmb der  
selben vrsach willen/ sendet er seine botten/ die dem volck  
Gottes wort vor sagen solen/ auff das sie sich drauß  
bessern/ vnd der künfftigen straff entfliehen mogen.  
Aber wo man es nit annemen/ sonder den spott drauß  
treiben/oder auch verfolgen will /da gehet es/das Got-  
tes grīm anbrennet/vñ Got zur straff genötiget wurd/  
wie wir denn an vns selb erfahren.

Zum andern/ neben dem das Gottes zorn durch  
verachtung vnd verfolgung des heyligen Euangelij/  
vnd durch mancherley abgotterey/ bisher erregt ist/  
sihet man auch wie vngedurlich wir vns sonst halten in  
vnserm leben. Wie ein gemein laster ist es nur/vmb das  
greuliche Gottes leßtern/ da man dem Herrn Christo  
sein leiden/wunden/ vnd blutuer gießen / welches vmb  
vnser seligkeit willen ist geschehen/ so iemerlich leßtert?  
Wie ein gemein laster ist es vmb das schendliche voll  
sauffen/da allerley vnzucht/hader/mord/vñ anders her  
wechßet? Wie ein gemein laster ist es vmb den wucher vñ  
geiz/das niemand den andern mit trewen meinet/ vnd  
yederman nur dahin dencket/ wie er reich werde/ got  
gebe es verderbe daneben wer da wolle.

Also sihet man/wie ein liegē vñ triegē in den hendeln  
ist.



ist. In summa/nimb für dich höhe oder nider stende/so würdest finden/ das es alles mit einander entwicht vnd verderbet ist/auch also seer/das kein Bürgerliche erbarkeit mer bey den leuten funden würdt/

Das nun Gott/nach dem er sein wort/vns zur buß zu fodern/hat lassen predigen/in solchem gottlosen ergerlich leben/lachen oder still schweigen/vnd nit vil mer in hauffen schlagen/vnd durch Türcken vnd anders vngluck vns plagen solt/das ist vnmüglich. Den was woltest du doch thun/mit einē knecht/magd/oder kind im hauß/das gar nichts vmb dich geben/vñ dir alles zu wider thun wolt? Ist es nit war/gute wort würdest du sparen/vnd dafür/ruten prugel/vñ stangen in die hand nemen/vnd zu schmeissen/oder zuletz gar zum haus vñ vom erb hinauß stossen?

Also hat Gott mit seinem eignen volck den Juden auch gehandelt. Er lies es nit felen an trewen Predigern/vnd fromen Propheten. Da sie aber nit hören/von irer abgotterey/vnd anderem gottlosen leben nit wolten abstecken/hört er mit dem predigen auff/vnd ließ den König zu Babel mit den vngehorsamen büßen umbgehen/der kundte sie mores leren/eben wie der Türck yetzund mit vns auch thut. Was jemerlicher abgotterey hat nur Vngern mit der juncfraw Maria triben? Was vnartigs wesens/Neuterey/vntrew/vnd andersts/ist drin gewesen? Gott hat zugesehen/so lang er kondt. Da aber kein besserung hat wollen folgē/hat er den zorn durch den Türcken der massen gehn lassen/das/wie oben von den Juden gemeldet/kein heylen/hüß/noch radt schir mer da ist.

Wir Teutschen gehn eben mit solchen sünden auch vmb/ Der meiste teyl/vnd sonderlich was sich Geistlich  
rhu



rhümet/verfolget das Euangelion/vnd bleibt bey der  
alten abgotterey mit Heyligen anruffen/ Auffs lesen  
vnd hören/ Kirch ferten gehn/vnd andern dergleichen  
abgottischen wesen. Solchs wil man mit dem schwert  
erhalten/vnd die armen Chriſten/so solchs nit thun wol  
len/oder dar wider/gewissens halb/reden/erwürgt  
oder veriagt man darob. Der ander teyl/so Gottes  
wort/vnd das Euangelion hat/ist auch rochlos/achtet  
der predig nit groß/bleibt on alle besserung im alten le-  
ben/wie man sihet/dz hurerey/ehebruch/wücher/geitz/  
liegen/betrieden/vñ allerley ergernus mit macht allent-  
halb gehet. Das ist nun der brunne/vnd die quelle/auf  
welcher der Türck/vnd alles vnglück seinen vrsprung  
hat. Wer nun von hertzen begeret/das solchem vnglück  
geweret/er/sein weyb/kind/hab vñ gut/vom Türcken  
mög errettet werden/der habe hie gute achtung auff/  
das er dise quelle mit sonderm fleyß verstopffe/das ist/  
das man mit solchem sünden sich fürtan nit mer belade/  
das weltliche Oberkeit sich an das Euangelion begeben/  
nach rechten Predigern trachte/den rechten Gottes  
dienst mit predigen vñ betten anrichte/allen öffentlichen  
ergernüssen wehre/vnd darnach ein yeder für sichselb  
in Gottes fürchte wandele/vnd für mutwilligen sünden  
sich hüte/vnd andern so in seim brodt sind/wehre. Wer al-  
so sich in die sache schicket/der könt hoffnung haben/  
Gott würde gnedig sein/vnd die straff entweder gar  
abwenden/oder zum wenigsten lindern. Wie den Gott  
selb im Propheten Esaia prediget im 1. Cap. vñ spricht.

Reyniget euch/thut ewer böses wesen von meinen  
augē /last ab vom bösen/vñ lernet gutes thun/trachtet  
nach recht/vnd helfft dem verdrukten/schaffet den  
weyßen recht/vnd helfft der widwen sachen/so kumpt  
b den



den/vnd last vns mit einander rechten. Wen ewer sünd  
gleich blütröt ist/sol sie doch schne weis werden/vñ wen  
sie gleich ist wie rosin farb / sol sie doch wie wolle wer-  
den. Wolt jr mir volgen/so solt jr des landes gut genieß-  
sen/wegert jr aber euch/vnd seyd vngehorsam/so solt jr  
vom schwerd gefressen werden/ denn der mundt des  
Herrn sagets.

In sonderheit sihet man wie der Herr allenthalb  
darauff treybet/man sol nit so vmbarhertzig vñ eygen-  
nützig sein/sonder gern andern geben/ vnd helfen/ so  
wölle er auch geben/ vnd helfen/ wie er im Euangelio  
verheist. Gebt/so würdt euch geben/ Ein voll gerutz-  
telt vnd ein gedrucktes maß würt man euch einmessen.  
Wer aber solchs nit thut/seines nechsten nicht achtet/  
vnd allein für sich geizet/der muß gewarten des zorns  
dauon der Prophet Michas am 6. Capitel sagt.

Ich/ spricht der Herr/wil dich auch anfahen zu pla-  
gen / vnd dich vmb deiner sünde willen wüst machen.  
Du solt nicht gnug zu essen haben/vnd solt verschmach-  
ten/Vnd was du erhaschest/solt du nit dauon bringen/  
Vñ was du dauon bringst/wil ich dennoch dem schwer-  
t vberantworten. Du solt seen vnd nicht erndten. Du  
solt öl kelttern / vnd dich mit dem selben nit salben / Vnd  
most kelttern/vnd den wein nit trincken ic.

Solches drowet der Prophet denen so ires geiz  
halb vnrecht gut gewonnē / vñ mit vnrechtem gewicht  
vnd kleinem maß/andern in kauffen vnd verkauffen dz  
ihre abstalē. So nun wir von der gleichen sünden nit ab-  
lassen/sonder auch also vnsern nutz schaffen vnd suchen  
wollen/so müssen wir je in der warheit auch eben ders-  
gleichen straff gewarten/vnd wer vnrecht/wo wir vber  
den Türcken/vnd andere straff vnd vnglück klageren/  
denn



denn wir wollen selb nit besser haben/ wir solten ;c sonst  
vns anderst halten/ vnd nit so müthwillig/ wider vnser  
gewissen vnd alle erbarkeit leben in disem vnd andern.

Derhalben/ liebes volck/ last vns vmb Gottes willen  
vnser not bedencken/ vnd nit selb jmer vrsach zu vnserm  
verderben geben. Es ist die geißel für der thur / die rut  
ist nit allein schon gebunden / sonder auch vns auff den  
rücken gelegt. Den wer empfindet vnd merckt nit / was  
jammers dem ganzem Reich algeret vom Türcken ist zu  
gefüget worden? Derhalb last vns doch vnser missethat  
erkennen/ vnser leben bessern/ vom bossem ablassen/  
vnd gutes thun/ Denn solches fordert Gott von vns in  
sein heyligen Euangelio/ durch welchs er vns/ wie ein  
hirt dem verlorren schaff/nach gehet / vnd vns zur buß  
suchet. Das lasset also das erste sein/das yederman lerne/  
wie ein yeder vnter vns zu solcher geißel vnd straff  
geholffen/vnd durch manchfeltiges sünden hab vrsach  
geben/auff das wir Gott vnser missethat klagen/vnd  
fortan ein yeder in sein stand vnd wesen vom bossem ab-  
lasse/vnd sich von hertzen bessere.

Zum andern last vns auch zu Gott vmb verge-  
bung solcher sünden / vnd nachlassung der wolverdien-  
ten straff betten. Denn Gott will gebeten sein/vnd hat  
vns Befolhen zu betten/wie wir wissen / das Gottes son  
selb/dz Vater vnser vns geleret hat/vn darnebe verheiß-  
sen/Betten wir in seinem namen/so sol es erhört sein. Jo-  
annis 16. Solchen Befelch vnd verheißung sollen wir  
woll vnd fleißig mercken wider die anfechtung/ welche  
sonderlich in diser gegenwertigen not vns am gebet hin-  
dert. Dañ weyl wir müssen bekennen / wir sind sündler/  
vnd der Türck sey ein rut vber vnser sünde/da lest sich  
ansehen/ als sey vnser gebet vergebens/Gott werde es



nicht hören/ Wenn wir aber from̄ vnd nit sünd̄er werden/  
als den̄ wurde er hören. Aber diser gedanc̄ ist falschs/  
denn wir sollen nit darumb betten/ das wir from̄/ vnd  
one sünd̄ sindt/ sonder das es Gott befolhen/ vnd durch  
Christū so ernstlich geheissen hat. Derhalb stellet vnser  
lieber Herr Christus das Erhören nit auff vnser from̄-  
keit/ sonder auff seinē namē. Was jr den vater/ spricht  
er/ betten werdt/ In meinem namen/ das wird er euch  
geben. Das ist. ewr gebet sol v̄m meint willē erhört wer-  
den/ v̄m meint willen wil der vatter geben was jr bet-  
tet/ Derhalb hute sich yederman hie für abgotterey.  
Den̄ Christus heist vns nit betten in Namen der Jung-  
fraw Maria. S. Peter/ S. Pauls/ noch ander heylig-  
en/ er heist in seinem Namen betten/ Der halben wer-  
des gewissen spilen/ vnd kein feel bit thun wil/ der trage  
Gott solche gemeine not ganzes Teutschenlandes/ mit  
herzen vnd ernst für/ wie es den̄ je ein groß not/ vnd son-  
derlicher jamer ist/ vnd beschließ darnach das gebet vn-  
geferlich mit disen worden: Lieber Herr Gott/ die not  
druckt vns/ erhȫre vns v̄m̄ deines sons Christi Jesu wil-  
len/ der vns verheissen hat/ du werdest vns erhȫren/ laß  
vns vnserer sünd̄ nit eintgelten/ laß vns mer genießē  
deines eingebornen Sones/ welches namen vnd ehr/ der  
Teuffel durch den Türcken drucken vnd dempffen wil/  
Wie er leyder an vil orten gethon hat ꝛc.

An solchem gebet hat Gott ein wolgefallen/ vnd  
würdt dadurch geehret. Derhalb würdt er mit dem erhö-  
ren nit aussen bleiben/ sonderlich wenn ein rechte buß/ vnd  
besserung des lebens mit folget/ Wie wir an den Ninui-  
ten sehen/ welchen der Prophet Jonas predigte/ es solte  
noch in 40. tagen die Stat v̄nter gehn/ wie Sodoma  
vnd Gomora. Da war je Gottes zorn vnd v̄n̄gnad  
nahend



nahend genug kommen/nemlich auff 40. tag. Aber sie demütigten sich/erkendten ihre sünd/vñ besserten sich / Da ließ sich Gott das vnglück gerewen/ wie der Text sagt: der König hab lassen ein Fasten auß rüffen/ vnd das volck zum hefftigen gebet / vñ besserung des lebens/ mit disen Worten vermanet: Ein yeglicher bekere sich von seinem Bösen weg/vñ vom freuel seiner hende/wer weis Gott möchte sich bekeren vnd rewē / vñ sich wenden von seinem grimmigen zorn / das wir nicht verderben. Da nun Gott sahe ihre werck/das sie sich bekereten von irem Bösem wege/da rewete in des vbelis / das er geredt hette ihnen zu thun/vnd thets nicht.

Also wil vnd muß es bedes bey sam sein/besserung des lebens vnd ein ernstes stettigs gebet. Wo es aber an der besserung mangelt/da würdt das gebet wenig außrichten / wie der Herr zeuget Esaie 1. Wenn jr schon ewer hende außbreitet/so verbirge ich doch meine augē von euch/ Vñ ob jr schon vil bettet/ so höre ich euch doch nit/den ewer hende sind voll blüts. Darumb leret der heylig Paulus/vnd gebeut 1. Tim. 2. Ich wil das die menner betten an allen orten/ vñ auffheben heylige hende/on zorn vnd zweifeln. Da will er man sol betten/ aber also/das man heylige hende auffhebe/ das ist/das man nit in mutwilligen sünden lige/ vñ wider das gewissen lebe/sonder sich bessere mit dem leben / vnd darnach bitte on zorn/das man im leyden nit vngedultig sey/sonder Gottes willen gedultig trag / vnd nicht zweifele/ Gott werde vns vmb Christus willen erhören/ vnd vns helfen.

Ob nun wol Gott vns' allein vmb Christus willen/ vnd nicht vmb vnser frombkeit/ oder guten werck willen erhören will/so fordert er doch solchen gehorsam von



vns/vnd wil ihn haben. Wer in aber nit leisten/ sonder  
ungehorsam wil sein vñ bleiben/ der mag auch der straff  
vnd alles vnglücks gewarten.

Derhalb last vns recht in die sachen schicken / War  
ist es/wir haben Gott hefftig erzornet mit vnsern sün-  
den/ aber so gar ist er noch nit erzornet/ er wil sich mit  
gnaden zu vns wenden/wen wir nur vns zu jm beferen/  
vnd vmb vergabung durch den Herren Christum mit  
ernst vnd gewisser hoffnung gotlicher hilff beiten. Dan  
wir haben je gewise vnd ser schöne verheissung/ das vn-  
ser gebet nit sol vergeblich sein. In sonderheit wen es zu  
Gottes ehr vnd dem lob seines nhamens gereichen sol/  
wie in disem gebet geschicht/ da wir wider den Türcken  
bitten/ der ein feind Christi vnd Gottes vnd der Christ-  
lichen Kirchen ist. Warlich warlich/ spricht der Herr/  
Johannis. 16 / was jr den Vatter in meinem nhamen  
bitten werdt/dz wirdt er euch gebe/ Bissher habt ir nicht  
gebet. Bittet so werdt ir nemen. Auff solche verheissung  
bettet mit andacht ein vatter vnser das Gott dem feinde  
de Türcken wehren/sein arme Christenheyt gnedig für  
im beschützen/vnd vnserm volck/einen frölichen sig gön-  
nen/vnd für allem jamer sie gnedig behüten wollen/  
durch Jesum Christum vnsern Herrn vnd seligs-  
macher Amen Amen.

Dem



# Dem erbarn vnd vhesten

Martin Pfintzing/ verordneten Ober-  
sten / vber der Sadt Nurnberg Kriegs volck  
wider den Türcken / meinem sonder  
günstigen Herrn.

**G**ottes gnad vndhilff / sey alle  
zeyt bey euch vnd den ewren. Amen.

Erbar vnd günstiger lieber Herr/  
erwerm beger nach / hab ich die verma-  
nung gestellet / wie vngeserlich dz volck  
zur Chrißlichen Buß / vñ ernstem gebet  
wider den Türcken / auff der Cantzel mag ermanet  
werden / hab es aber auch der vrsach halb öffentlich wöl-  
len im Truck außgehn lassen das ich von E. E. verstan-  
den habe / wie an anderen orten etliche leute vñ ein sol-  
che Form gebeten haben / so Gottes wort wol hertzlich  
begetet / aber doch biß anher nit haben erlangen kön-  
nen. Auff das aber / solche guthertzige frome leut auch  
ein gewisse anleitung zum gebet hettē / welchs in gegen-  
wertiger not sonderlich von nöten ist / hab ich den 79.  
Psalm mit einer kurtzen außlegung hin zū thun / der  
hoffnung / wo man sonst kein rechtschaffne Prediger  
hett / es sol dennoch ein Chriß / ein wenig in die sachen /  
auß solchen vnterricht / sich schicken können / das er in  
solcher not für sich vnd andere recht könne betten.  
Ich habe aber solchen Psalm darumb vnter E. E. na-  
men lassen außgehn / das E. E. mich zu solcher arbeit  
am



am meisten haben verursacht. Denn neben dem/das  
solche gemeine not/mir sonderlich zu hertzen gehet/der  
halb ich gern in meiner kirchen/ alles thun vnd anrich-  
ten wolt/ das zu wolffart der Christenheit dienstlich ist/  
so habe ich L. L. in sonderheit versprochen/ ich wölle  
samt meiner Kirchen im gebet L. L. nit vergessen.  
Vñ zu fudernuß solcher gemeiner fürbitt/ hab ich erst-  
lich disen Psalm an 8 mitwoch zu predigē fürgenommen/  
Darnach anderen fromen Christen zur lehr vnd vnter-  
richt/in Druck verfertigt. Bit derhalb nit allein diß/  
das L. L. solchen meinen guten willen zu danck wöl-  
len annemen/sonder vil mer/ das L. L. ein gutes hertz  
zur sachen haben/vnd Gottes gute vñ hilff sich trösten  
wölle. Den erstlich ist da/der ordenlich beruff/nit allein  
von vnser Oberkeit hie/sonder von Gott selb im himel/  
der nit wil/ das man still sitzen/ den feind vnschuldiges  
blut vergiessen/vnd abgotterey anrichten sollassen.

Zum andern/gleich wie der beruff gottlich vnd recht  
ist/also ist je das werck an im selb auch heylig vñ gut/ Ds  
Got lob/bey vnserm teyl/in solchem zug kein ander für-  
nemen ist/denn wie dem feind gewehret/das vaterland  
errettet/der rechte glaub vnd Religion handgehabt/  
weib vnd kind beschützt/vnd vor des feindes gewalt/vñ  
allem Gottlosen wesen erhalten werde. In solchem für-  
nemen/ist je gute hoffnung/ Gott werde seinen segen  
geben. Derhalb erbar vnd gunstiger lieber Herr/läst  
euch bey der sachen nit grausen/Gott wil wider solchen  
feind bey vns sein/so fern wir es auch mit hertzen vnd  
ernstem gebet(wie mir an L. L. nit zweyfflet) Begeren.  
Vnd lige nit daran/ das der feind mit solcher macht  
vnd menge sich rüstet. Got hat lust dazu/wen man am  
sichersten vnd am besten gerüstet/vnd des sigs am ge-  
wissesten



wisſeſten iſt/das er ſeine macht ſehen laſſe/ vnd dem klei-  
nem heufflin helffe/das gott fürchtet/vnd des ſiges von  
im gewartet. An ſolche hoffnung wollen wir vns  
yezund auch halten / Vnd ob wir gleich mit leuten  
ein wenig gerüſtet/büchſen/ ſchwert/ vnd ſpieß/ wider  
den feind brauchen müſſen/ſo wollen wir doch/ wie der  
20. Pſalm leret/ nit auff roß vñ wagen/ wie der Türck  
auff ſeine menge/ vns verlaſſen/ Sonder an den na-  
me des Herrn vnſers Gottes dencken/ vnd ſprechen:  
Hilff Herre/vnd erhöre vns/ wenn wir rüffen. Amen.  
Amen. Gott der vatter/vnſers lieben Herrn vnd er-  
löſers Jeſu Chriſti/beware euch vnd den ganzen hauf-  
fen/ zu ſeyner ehr Amen. Grüſſet mir ewren Predi-  
ger. Datum Nürnberg am tage Vrbani 1542.

Ewer williger Vitus Dietrich/  
in der Sebalder Pfarckirchen  
Prediger.

**c** Wie



# Wie das Gebett zu stel= len sey ein kurtze vnterricht.

**E**s ist wol war / das Christus  
allerley not / da man für betten soll vñ kan /  
auff das aller eigentlichst vnd gewissest in  
das Vater vnser verfasset hat. Derhalb  
nit von noten ist / eigene gebet zu machen /  
sonderlich weil wir den vnterricht von  
Christo haben / das man zum gebet / so es anderst crnst  
sein / vnd recht gehen soll / nit vil wort bedarff. Vnd der  
Herr an den Heyden straffet / das sie vil wort machen /  
denn solchs hat ein ansehen / als bettetten wir zu ein  
solchem Gott / der wie entwider ein vmbarmhertziger /  
oder vngelerter Richter / die sachen nit ehz verstehn kan /  
noch annemen will / man trage sie denn mit vil worten  
für. So doch der Herr Christus vns sonderlich deß ver  
erbstet. Erstlich wann wir bettē / so betten wir zu vnserm  
vatter / der art vnd natur halb anderst nit kan / den gne  
dig sein / vnd geben was wir seine arme kinder dörfen.  
Zum andern dz Gott / ehe denn wir betten / zuuor weiß /  
was wir notdörfftig sind. Vnd nit allein dasselb / sonder  
das noch mer ist / wz vns zu seel vñ leyb nütze / vñ gut sey /  
Sonderlich aber / dienet das Vater vnser vber die  
massen fein zu diser not / die yetzund ganzem Teutschem  
landt / des Türcken halb / auff dem halse ligt. Denn  
nimb es von stück zu stück für dich / so würdest müssen  
bekennen / wenn du es anderst recht verstehest / es reyz  
me sich so fein vnd artlich / als were es allein auff dise  
Türcken



2  
KRUTH MEMORIAL LIBRARY  
AL. CEMETARY  
DELPHIA  
Türcken not gemacht/vnd gestellet. Ja sprichst du/ist doch des Türckennit mit einem wortlein drin gemeldet? War ist's/wer den Worten bloß wil nach dencken. Aber dencke du dem sinn nach/ so wirst du finden/ das es nicht allein wider den Türcken/sonder auch wider disen geist sonderlich gehet/der den Türcken zu solchem morden/zu abgottcrey/vnd allerley/lügen/schand/vnd vnzucht/treybet vnd dringet.

Denn erstlich bitten wir je/ das Gottes name geheyliget werd. Weil aber der selb name durch falsche leer/vnd vnzelige lesterung vom Türcken vngeheyliget vnd verlestert wurd/ so must du je eben als wol wider den Türckē/ in disem punct bettē/als wider den Papst/Bischoffe/Pfaffen/München/vnnd allen den Gotlosen hauffen/ der das Euangelion Christi nit annemen will/sonder es mutwillich verfolget vnd lestert.

Also wenn wir betten/ das Gottes reich zu vns kome/vnd sein wille geschehe/ da fassen wir je Teüffel/Papst/Türcken/vnd alles zusamen/ so wider Gottes Reich ist/das Gott irem Reich wehren/vnd abbrechen/iren willen zu ruck treiben/vñ mit seinem heillgen Geist bey vns wonen/vnd also seinen willen bey vns fürdern/vnd von vns erfüllen wolle lassen.

Wer aber vmb das teglich brot bittet/ der muß je des Türckens nit können vergessen/ sintemal/ er der Türck/land vnd leut verwustet/ alle Narung vnd handel/jaleyb vnd leben nimpt/kein Oberkeit/kein Recht/kein billickeit bleiben lest/ Den eltern ire kinder/ den mannen ire weiber/vnd den weybern die manne nimpt/sie entweder selb schandlich mißbraucht/oder wie das vihe/verkauft zu ewiger vñ jemerlicher dienstbarkeit/Vñ sonderlich vnter dem jungē volck/kein andere zucht  
c 2 lest



lest/ den das ers mit gewalt zur abgötterey/ vnd das sie  
den Herren Chrustum verlaugnen treybet/ vnd darnach  
anderst nicht dann morden/ vnd alle vnzucht leret. Wie  
den sein bestes friegs volck/ eytel verlaugnete Christen  
sind/ die er den eltern geraubet/ vnd nach seiner art vnd  
weiß auffgezogen hat. Wer solchs für sich selb/ oder mit  
seinen kindern erfarn muß/ der mag je klagen/ er sey des  
teglichen brodts beraubet/ vnd esse/ wo ers anderst hat/  
nur eytel zorn/ vnd fluch brodt/ welchs Gott nicht auß  
gnaden/ wie das teglich brodt/ darumb die Christen bit  
ten/ sonder auß lauter zorn/ vnd vngnad gibt.

Wann wir nun im Vater vnser weyter gehn/ vnd  
auch bittē vñ vergebung vnserer sünde/ da werden wir  
nit allein erinnert/ das der Türck/ ein verdiente straff  
vnserer sünde sey (wie es denn die warheit ist/ vñnd wir  
eygentlich solcher straffe nit ehe gar werden entlediget  
werden/ wir bessern vns dann/ vñ halten vns nit so gar  
vndanckbar vnd vngedurlich gegen das heylige Euan  
gelion/ vnd vnsern nechsten/ wie bißher) Sonder weyl  
wir vergebung der sünden bitten/ schliessen wir auch  
mit ein/ nachlassung des zorns/ vnd der straffe/ so wir  
durch die sünde verdienet haben.

Das vns aber Gott nit in anfechtung ein führen/  
sonder durch seinen heyligen geist/ vnd wort vns gnedi  
gklich wider er auß führen/ vñ also von allem vbel/ hie auff  
erden erlösen wölle/ solchs ist ye auch ein sonder notige  
bit wider den Türcken/ welcher nit allein vnserm leibe/  
leben vnd gut nachsettel/ sonder auch sein abgötterey  
außbreiten/ vnd vnseren Christlichen glauben gedencet  
zu dempffen. Vnd fasset also diß stucklin des Vater vn  
sers/ nit allein vnser not/ die wir nun mer alt/ vñnd ob  
Gott will/ zum vngegründten/ lügenhafftigen Gotsle  
sterlichem



sterlichem Mahometischen aberglauben/nit wollen ab  
geführt werden/ sonder auch vnserer Jugend/ vnserer  
süne vnd töchter not/ das sie Gott auch gnedig/ bey irer  
Tauf/ vnd in angefangner gnade erhalten/ vnd für sol  
chem greuel behüten wölle bis an das ende. Denn vor  
augen ist es/ was dise grewliche vnd letzte anfechtung  
sey/ welche der Teuffel durch den Türcken in der welt  
hat angerichtet/ dz die aller schönsten lender/ Aegyptē/  
Syria/ Asia/ Grecia/ Epirus/ Macedonia/ vnd was  
hernach bis an Deutschlandt fast reicher/ den Christen  
glauben verloren/ vnd ein Türckey wordē sind/ da doch  
zuuor/ zum teyl die Apostel selb geprediget/ vnd die kir  
chen auff das schönst haben angerichtet/ zum teyl sonst  
dapffere/ gelerte/ gottföchtige Lerer/ vnnnd Bischoffe  
gewesen sind/ dergleychen wir in der Romischen kirchen  
nit können rhūmen. Solches sol je/ den eltern/ so Chri  
sten sind/ zu hertze gehn/ dz sie für sich vñ ire nachkōmen  
wider den schendelichen feinde betten/ weñ sie wider die  
anfechtung/ vñ vmb erlösung von allem vbel bitten.

Also sihet man durch auß/ wie es nit von nöten ist/  
andere gebet machen. Denn im Vater vnser ist es vber  
die massen fein vnd artlich schon zuuor gefasset/ vñ vns  
fürgelegt/ alles was wir hie auff erden/ zu leib vnd seel  
bedörffen/ Das man das Vater vnser wol mag rhū  
men/ für das sonderlich meisterstück/ vnd außbund/ dar  
inn man lauter Gottes weyßheit jnen spūret/ vnd leuch  
ten sihet. Das man aber möchte dencken/ es sey zu  
kürtz (denn eygentlich/ aller not vnnnd anfechtung ist  
tausentmal auff erden mer/ denn wörter im Vater vn  
ser sind) so ist doch auch dises war/ ein ernstes gebet/  
darff nit vil wort/ es darff nur eins rechten/ jnnrechtiz  
gen/ vnd glaubigen hertzes/ das die not verstehe/ vnnnd



Gott eygentlich fürtrage. Solches hertz drücket durch/  
die wort: hū es allein nit/wie wir an den Aposteln sehen  
Math. 8. Die machten nit ein lange predig/da sie das  
met vnd der wint alles vnglück wolten anlegen/ den die  
not wolts auch nit leyden. Mit wenig Worten richteten  
sie de sachen gar auß/das sie sprachen/Herre/hilff vns/  
wir verderben. Das heysen not gebet/die sind kurz  
vnd gut/den es ist ein rechter ernst/welcher Gott nit ru  
gen leß/er dencket wie er vns/vnd im des not geschreies  
abhelffe/wie der Herr Christus Luce am 18. von dem  
vngerechten Richter saget/welcher der widwē geschrey  
nit lenger mochte leyden/ vnd auß vngedult jr recht  
schaffete.

Nun aber/ob die anfechtung gleich groß ist/so ist  
doch nit allenthalb so ein eylende vnd dringende not.  
Derhalb wo ein mensch raum vnd zeyt hat/sich zubesin  
nen/da kan der geist auch wol andere/vnd meer wort  
zu seiner not suchen/denn im Vater vnser angezeyget  
sind. Vnd dienen daselb die viel wort/nit dazu/als dörfte  
te Gott solchs langes erinnerns/vnd vil flehens/sonst  
der es geschicht vnserhalb/das wir den geist erwecken/  
vnd etwas zum gebet hitziger machen/wenn wir mit  
fleiß allen vmsstenden/wie es yetz gehet/wie es vor her  
gangen ist/vñ hernach am ende sich finden werde/nach  
dencken/vnd in vnser gebet mit einschliessen.

Auff dise weys sihet man/das die heyligen Pro  
pheten/vnd andere/bisweylen gebettet haben. Wie ein  
langes vnd grosses klagen hat Jeremias seines volcks  
halb/in den klag liedern? Ezechias hat auch ein lan  
ges gebet Esa. 38. Also auch Daniel. am 9. Vnd man  
sehe nur die Psalmen an/da Dauid oft nur ein stuck  
auß dem Vater vnser für sich nimbt/vnd macht einen  
schönen



schönen langen Psalmen drauß. Wer nun zu solchem  
langem gebet ein andacht hat/sonderlich in der sachen/  
die wir yetzt für habē/wid den Türckē/der mag für sich  
nemen/den 79. Psalm. Den der selb reymet sich ganz vñ  
gar auff solchen fall/welchen wir heutigs tags für vns  
haben. Der Prophet sihet/was für jammer/des volcks  
halb/fur handen war/das Gott das ganze land vmb  
irer sünden willen/von den Babiloniern wolt verwüste  
lassen. Wie nun in solcher not/zu beten sey/stellet er ein  
form wie vnden folget. Auff das aber der selbe Psalm  
auch von einfeltigē vñ vngelertē/wid dē feind dē Türck  
en/mit verstand möge gebetet werden/hab ich in ein we  
nig wölle erklerē/nit nach der leng/sonder in kurtz/so vil  
es zu disē handel dienstlich ist/vmb dergemeinē not willē  
die nit allein des Türckē halb verhanden ist/sonder das  
vor augen ist/wie leyder allenthalb/in Teütschland/do  
der Papst vñ sein geschworne hauff noch dz Regimēt  
habē/weder lehrt noch weys ist/wie man betten vñ sich in  
dise sachen recht/vñ Christlich schickē soll/der vngelertē/  
verkereten/vnd Gottlosen Pfaffen halb/welche sie zu  
Kirchē diensten vñ Pfaremptern brauchē. Gott helffe  
durch seinē heyligē Geyst/dz es einmal besser werde/vñ  
die Blinden/verirrten leut sich erkennen/vnd Gott die  
ehre geben. Amen.

Auflegung



# Auslegung des neun vnd sibentzigsten Psalmen.

Ein Psalm Asaph.



**D**er es sind Heyden in deiner erbe gefallen/ die haben deinen heyligen Tempel verunreinnet/ vnd auß Jerusaleem stein hauffen gemacht.

Wir wollen disen Psalm in zwey stück teylen/ das erst/ ist ein klag/ in welcher der Prophet Gott den jamer fürhelt/ wie vbel es mit seinem volck gehe. Das ander ist ein gebet/ das Gott mit gnade sich wider zu seinem volck wenden/ inen von den Heyden helfen/ vnd die Heyden/ vmb irer vmbarmhertzikeit willē straffen/ vnd sie nach irem verdienst auch bezalen wolle.

Weil nun der Prophet durch den heyligen Geyst/ sein gebet wider die Babilonier also stellet/ so können wir in diser vnser not der gleyche auch thun/ Vñ erstlich Got dē jamer klage/ der vber seyne Christenheyt gehet/ darnach auch vmb vergebung der sünde vñ hilff zu im schreien.

Nun



Nun scheinet es aber / als sey es vnnot / das man  
Gott vnser ellend vnnot fürtrage / vrsach / er ways es je  
vor woll / vnnnd sihet on zweyfel bas dan wir / nit allein  
was des Türcken mißhandlung / gegen der Christenheit  
ist / sonder auch was der Teuffel / so den Türcken also  
zu morden treibet / damit im sinn hat / vnd süchet. Aber  
wie oben gemeldet / Gott darff keines langen gebets /  
als köndte er sonst die sache nit verstehen. Wir aber durf  
fen es dazu / auff das wir vns der not wol errinnern / vn  
also zum gebet hitziger / vnnnd anhebischer werden. Der  
halb braucht der Prophet vber die massen schöne / vn ey  
gentliche wort bald im anfang / auff das man ja sehe /  
das es im ernst sey / vnd er die not wol verstehe.

Er ruffet den Herrn an / nach dem befelch des an  
dern Gebottes. Denn außser Gott soll man niemandt  
anruffen noch anbeten / nit allein darumb / das sonst nie  
mand weder im himel noch auff erden / vnser hertzen se  
hen / vnd vns helfen kan / sonder auch darumb / das wir  
Gott allein solche ehr / vnd sonst niemandt geben sollen.  
Denn er wil auch allein haben / wie er spricht: Du solt  
Gott deinen Herrn allein anbeten / vn jm allein dienen.  
Vnd im Psalm. Küsse mich an in der not / ich wil dich  
erretten / vnd du wurst meinen namen preysen.

Denn hie muß man sich hüten / das man nit (wie  
die Papisten mit iren Processen / vnd andern / thun) die  
Jungfraw Marien / noch andere Heyligen anruffe.  
Solches ist ein abgötterey / vnd in sonderheit von Chri  
sto verbotten / da er leret wie wir zu Got recht sollen bet  
ten / Nemlich das wir im namen Christi sollen bitten.  
Auß dem folget je / wer in einem andern namen bittet /  
der selb vergleicht die creatur / dem son Gottes / das ist  
ein greuliche abgötterey / vnd der fürnemsten sünde ei



ne/ vmb welcher willen Gott den Türcken vber vns  
lest kōmen.

Nun ist aber dis sonderlich wol zu merckē/ das der  
Prophet nit also sagt/ Herr/ sihe wie es vns so vbel geht/  
wie vbel man vns handelt. Den solchs heist nur allein ge  
klaget vnsern halb. Er stellet aber die klag also/ das er/  
Gott/ sein ehz/ vnd namen mit einflichtet/ auff das/ wo  
Gott gleich vnsern halb nichts zur sachen thun wölte/  
er dennoch seines namens vnd ehz halb/ nit gar kōndte  
still sitzen/ noch stets zusehen/ sonderlich/ weil solchem  
namen vñ ehz die Heidē abbrechen/ die nach Gott nichts  
fragen/ ihn nicht kennen/ sonder mit ler vnd leben auff  
das greulichst lestern. Das also diser vers/ nit blos des  
teglichen brodts halb klaget/ das sie in ellend vnd jamer/  
in krieg vnd vnfrid/ wie arme trostlose leut vmbwartē/  
sonder er klaget auch darumb/ dz Gottes nam nit gehei  
liget/ sein reich verhindert/ vñ sein wil verachtet wurde.

Denn solchs bringen die wort eygentlich mit sich/ dz  
er dem Herrn klagt vnd spricht/ Herr/ in dein erb sind  
Heyden gefallen/ Als wolt er sagen/ es geht solcher jam  
mer nit vber vns/ als vber leut/ die niemand angehören/  
vnd keinen Herrn haben/ wir sind dein erb/ dein eignes  
güt/ das du durch so vil wunder/ durch so grosse wol  
that/ vor dem Teuffel bißher beschützet/ vnd in der welt  
erhalten hast/ warumb wilt den die heyden also in dein  
ererbtes gut fallen lassen/ vnd dein volck nit retten?

Hie mercke aber mit fleys/ so der heylig Geyst den  
Juden vorbietet/ vnd sie darumb ein erbe Gottes nen  
net/ das sich Got jr angenommen/ inen durch grosserwun  
derwerck auß Aegipten geholffen/ vñ ins land Canaan  
eingesetzt/ vnd wunderbarlich wider die Heyden erhal  
ten hat. Wie vil mer wie billiger sollen wir vns rühmen/  
das



das wir Gottes erbe sind/sintemal vns Gott durch das  
blut seines eingebornen sones/ im zum eigenthum er-  
kauft vnd gemacht hat?

Aber hiemit werden wir auch erinnert/wie es sich  
in keinen weg leyden wil/so wir vns (wie wir den in der  
warheit können) für Gottes erb/vnd eygenthum wol-  
len räumen/das wir auff vnser Herrn vñ Gottes wort  
vnd willen nit sehen/sonder vil mer/dem Teuffel vñ vns-  
serm bösen willen/vñ der welt folgen wolten. Der halb  
wer also zu Gott rüffen/vnd sich für ein stück seines er-  
bes räumen wil/der hüte sich für sünden/laß ab vom bö-  
sen/vnd fleissige sich deß/das sein erbherr von im haben  
wil/vñ er als ein knecht zuthun schuldig ist. Sonst wurde  
Gott/nach dem erb so groß nit fragen/vnd im vmb an-  
dere/so sich seines willens fleissen/vñ sehē. Wie Paulus  
sagt/das es den Juden gangen haß/ Vnd vns Heyden  
warnt/wir sollen vns hüten/dz der gleich vns nit auch  
widerfare. Rom. 11. Sey nicht stolz/sonder fürchte  
dich. Gott hat der Natürlichen zweig nit verschonet/  
das er villeicht dein auch nit verschone.

Solche weyse zu betten brauchet der Prophet wey-  
ter/vñ sagt nit schlecht/Die Heyden habē vnsern Tem-  
pel verderbet/sond also. Sie habē **DEIN** heylis-  
gen Tēpel verderbet. Als wolt er sagen/Lieber Herr/du  
sollst dich je solches jamers eßē so hoch vñ teur annemē/  
als wir selb. Der Tempel heysset wol vnser tempel/dar-  
umb das wir drin predig gehöret/gebettet/vnd geopfer-  
t habē/Aber vil mer/vñ eygentlicher ist es dein Tem-  
pel/da man dich innen gesucht vnd gefunden/nach de-  
nem wort dir gedienet/dich angeruffen/vnd gedancket  
hat. Weyl nunder Tempel verwüestet vñnd zerbrochen  
ist/Wo wollen wir nun hin/das wir furt an deinen na-  
men



men anruffen vnd dir dienen? Den es ist dem Prophe-  
ten nit vmb die stein/ vnd das zimmer zuthun/ sonder dar-  
umb ist es im zuthun/ das Gott durch sein wort/ Befolhen  
hatte/ man solt im da allein vnd sonst nyrgendt dienen.  
Weylnun der Tempel verwüster/ vnd weg war/ so war  
auch der eusserliche Gottes dienst aller hinweg. Das  
ist aber je ein sunder grosse not/ daruber man klagen/ vñ  
Gott vmb hilff anruffen/ sol.

Bey vns im neuen Testament hat es nit ein solche  
meinung/ das der eusserliche Gottes dienst/ an einen ge-  
wissen ort müsse gebunden seyn. Aber dennoch sihet man  
wie es ein jamer vber alle jamer ist/ Dß wo der Türck o-  
berhäd hat/ da selb kein offentliche predig/ kein offentliche  
versamlung zum gebet/ vñ brauch der Sacrament gesta-  
tet würdt. Ob er nun gleich nit wehrē kan/ wie ein yeder  
vater sein kindt/ vñ gesind im hause vnterrichte vñ lere/  
so ist es doch am tag/ das solche hauß zucht vnd vnter-  
richt/ auch in die lenge sich nit halten kan/ wo nit die pre-  
dig/ vnd ander Gottes dienst offentlich im werck gehet.

Derhalb/ haben wir je auch billich Gott darumb  
zu klagen/ das durch disen feind/ der Tauffstein/ altar/  
vnd Predig stul/ auß der kirchen gerissen/ vnd also aller  
eusserlicher Gottes dienst ernider gelegt würdt/ das  
mit der zeit/ alles Türckisch mus werden/ mit glauben  
vnd leben. Wer nun solchs weiß/ der kan je mit rechtem  
glauben vnd gewisser zuversicht zu Got vmb hilffschrey-  
en/ vnd hilff gewarten/ sintemal er sihet/ das es Gottes  
eh: vnd namen erfordert/ dß dem grewlichen feind bald  
gewehret werde.

Wem nun solchs gebet rechter ernst ist/ der würdt  
in alle weg/ weiler Gottes wort/ vnd die heyligen Sacra-  
ment noch hat/ Gott für solche gnaden dancken/ welche  
die



Die arme leut nun verloren habē / so vnter dem Türcken  
sind / vnd sich dagegen wie ein Christ halten / das Sacra-  
ment oft / vnd mit dancksagung brauchen / vnd sich fleis-  
sig in dem wort halten. Vnd sonderlich Gott danken /  
das er noch rechtschaffene Prediger / vnd trewe seel sor-  
ger gibt. Vnd darumb bitten das ers ferner geben / vnd  
zu seines namens ehr auch auff vnser nachkōmen erhal-  
ten wölle.

Vnd vmb diser vrsach wille gedenckt der Prophet  
hie der stat Hierusalem auch / das sie sey zum stein hauf-  
fen gemacht / dazu vor vmb des Tempels / vnd Gottes  
dienst willen / alle Juden im ganzen land / des jares mer  
dann ein mal sind zusamen kōmen / da / wie der Psalm  
rhumet / grosse kōnig in grām vnd zorn sich oft gelegert /  
aber durch Gottes neben schutz vnd hilff / vergebens wi-  
der haben müssen abziehen. Vezund / spricht er / ligt in  
der aschen. In Summa / es ist dem Propheten darumb  
zu thun / vnd wir sollens lernen / das wir vns auch dar-  
umb annemen / das nit allein vnser leib / ehr / vnd gut /  
vor solchem greulichem feind befridet / sonder das Got-  
tes wort vnd der rechte Gottes dienst nit gar vertilget /  
vnd wir / auch vnser nachkōmen / nit gar zu Türcken  
werden / vnd also an leib vnd seel schaden leyden.

Sie haben die leichnam deiner knecht den vo-  
geln vnter dem himel zu essen geben / vnd das  
fleysch deyner Heyligen den thieren im land.

II.

Sie haben blut vergossen vñ Hierusalem her  
wie wasser / vnd war niemand der begrube.

III.

Der Prophet helt die rechte Ordnung / nach dem  
Vater vnser / vnd Zehen gebotten. Den das er bisher

d 3

flagt



klagt hat/geht fürnemlich auff die erste Tafel/das der  
feind/den Gottes dienst vnd das wort auffhebe/oder  
wie es im Vatter vnser heisset/Gottes namen entheyli-  
ge/Gottes reich vnd willen entgegen sey. Vezund/ob er  
gleich wol solchs auch mit meldet/denn er spricht/Die  
Knecht des Herrn vñ seine Heylige werden erwurget/  
solaut es doch gewaltig auff das fünffte Gebott/dz die  
feinde greuliche mörder sind/vnd eben der leute als we-  
nig achten als Gott. Denn der Prophet machets greu-  
lich/das er nit bloß sagt/sie erstechen/vnd erwurgen  
vns/sonder die leichnam deiner Heyligen geben sie den  
vogeln vnter dem himel zu fressen/vnd den wilden thie-  
ren/vnd vergiessen blüt wie wasser/das man nit gnug  
Begraben kan.

Eben wie der Türck auch thut/der mit grossem  
hauffen die gefangnen wehlosen Christen saibelt/die Kin-  
der an die zeune spisset/die Köpff auff spiessen vor jm her-  
tragen leß/welchs ein greuliche/vnd nit allein bey vns  
ein vnerhörte Tyranny ist/vnd wol wert/das wir drus-  
ber klagen/vnd wider solchen feind betten/Sonder man  
finder auch dergleichen vnbarmhertziges vnnnd wildes  
mordens kein exempel/auch in der Heydē Historien/on  
was die Scythen/vnd andere Barbari/bis weylen auß  
sonderm zorn thun haben/da es doch der Türck allent-  
halb thut/aus keiner andern vsachen/den das in der  
Teuffel also treybet wider die Christen.

Nun aber wissen wir/wie Gott durch vnnnd  
durch in Mose/vñ den Propheten/sonderlich drowet/  
wie er ein vngesallen dran hab/vnnnd greulich straffen  
wölle/wo man also mördet/vnnnd vnschuldiges blüt  
vergeussset. Derhalb/so wir mit dem Propheten/disen  
vers wider den Türcken mit ernst betten/können wir  
dest



dest mer hoffnung haben/ Gott werde solchs gebet erhö-  
ren/ vnd dem feind nit jmer dar zusehen/ das er solches  
morden treyben solt/ wider die knechte des Herrn/ vnd  
seyne heyligen/ die Gott erkennen/ jm dienen/ vñ in heyli-  
gem lebē sich haltē. Den da sind zwo vsach/ welche bede  
Gott treyben zur rache. Der feind mordet/ vnd kan des  
blüts nit satt werden/ das gefelt Gott vbel/ vnd wil es  
nit leyden in die lenge. Denn es ist je wider sein wort.  
Nun aber mordet er nit allein/ sonder mordet die knech-  
te vnd Heyligen Gottes. Das würdt Gott zu mal nit  
leyden noch sehen können. Denn mit der weyse müste  
Gott seyner knecht vñ kirchen beraubet werden/ vñ der  
Nachomer alles innē habē. Dz sol/ ob Gott wil/ nit ge-  
schehen/ es breche gleich mit dem Türcken wen es wölle.

Nun aber ist hie ein nötige frag/ die wir nit können  
vñgehen. Er spricht: Sie erwürgen deine knecht/ vnd die  
Heylige/ vnd bittet doch dar nach vñs vergebung der  
sünde. Das ist ein gewisse anzeygung/ das sie mit der  
sünde solchen zorn verdienet habē. Wie kan er den solche  
leut heylig vnd knechte Gottes heissen. So sind der Pro-  
pheten predigten/ vnd die Histori selb vorhanden/ auß  
welchen man gnugsam sihet/ was für greuliche abgöt-  
terey die Juden getriben/ wie sie Gottes wort/ vnd die  
fromen Propheten verfolget/ vnter sich kein lieb geus-  
bet/ sonder auff das schendlichst/ wie yetz bey vns auch  
geschicht/ geizet haben/ vnd dabey alle vnzucht triben.  
Das sind je nit heylige leut/ sonder böse verzweiffelte bu-  
ben/ da kein predigen noch vermanen an hilfft. Wie  
kumpt es denn/ das sie der Prophet knecht Gottes/ vnd  
heyligen Gottes nennet. Was knechte vñ Heyligen Got-  
tes sind/ die haben den vertroft/ Gott werde ob ihnen  
halten/ sie auch mitten jm todt vnd allem vnglück bewa-  
ren.



ren. Dagegen müssen böse buben/ des Türckens vnnnd  
alles vnglücks sich besorgen. Den solchen drowet Gott  
allenthalb / das er sie mit der ruten heim suchen vñ ihne  
ires sündhafften lebenshalb nit schonen wölle.

Vnd ist mir nit zweyffel/ ein fromer Christ / der / heu-  
tigs tages disen Psalm wider den Türcken bettet wirdt  
sich sonderlich an disem stuck hie stossen/ vnnnd dencken/  
Der Prophet sagt/ die knechte Gottes vnnnd seine hey-  
ligen/ werden erwürget/ wie wil sich aber solchs in mein  
gebet schicken. Den da müssen wir alle bekennen/ dz krigs  
volck ist den meisten theyl dermassen/ das es weder nach  
Gott noch den leuten fraget/ vnd in allerley vnzucht vñ  
laster teglich liget/ sonderlich aber/ mit Gottes lesteren  
sich so vbel hellt/ das es nit möglich ist / das solchen leutē  
Gott solte den sig geben/ ich geschweige das man sie hey-  
lig/ vnd knecht Gottes künde rhümen.

Also die land/ so der Türck zum theyl ytzund hat vn-  
ter sich bracht/ als das Königreich Ungern/ vnnnd Was-  
lachi/ zum theyl hefftig plaget hat/ vnd noch/ als Osterreich/  
Steyr/ Kernten/ vnd andere anstossende landt-  
schafften/ da ist zubesorgen/ wir können auch nit vil von  
rechtem Gottes dienst rhümen. Denn was für ab-  
götterey inn Ungern gewesen/ vnnnd wie hefftig die  
Ungerischen Bischoue drob gehalten vnnnd sonst haus  
gehalten haben/ weiß man guter massen gnungsam. An  
den andern orten/ hat Gotes wort noch nie kein platz ge-  
habt. Wo ein fromer prediger gewest/ hat man in nit ley-  
den wöllen/ vnd sind die in allerley fahr vñ not/ daruber  
kōmen/ so sich rechtschaffner prediger habē angenomē.  
Was aber für ein leben vnd wandel an den orten könne  
sein da man Gottes wort nit hat/ noch haben will/ ist  
leichtlich zuermessen/ den neben allem andern vnglück/  
sind



sind auch an solchen orten die Widertauffer vnd Sacra-  
ment schwerer mit macht eingerissen.

Eben also stehet es an dē orten/da man des Türck-  
ens noch gewarten soll. Denn die Bischoue wollen das  
Euangelion weder sehen noch hören. Vnd sind so ganz  
vnd gar verstocket / das sie auch nit den minsten miß-  
brauch/da sie doch selb müssen bekennen/ das es ein miß-  
brauch sey/gedencken ab zu schaffen. Das Sacrament  
wollen sie den Christen nit ganz geben/ wie es Christus  
befolhen vnd eingesetzt hat. Sie verpieten die ehe/ vnd  
wollen lieber huren Pfaffen/den eeliche Kirchen diener  
haben. Sie machen ein todte sünd draus/ wo man am  
freitag fleisch isset. Vñ wer wil doch nur alle mißbreuch  
erzelen? Tyranniseren daneben / wider ire vnterthan/  
treiben sie zu einer gestalt/zubeichten/Seelmessen/ Vi-  
gilien/Processien/vnd was der gleychen abgötterey vñ  
mißbrauch mer ist.

Wir auff vnserer seiten/haben (Gott sey lob vnd  
ehr) das Euangelion recht vnd rein / Aber / wie vil jar-  
mers vñ ergernuß erregt der Teuffel auff allen seiten/  
vnter allen stenden/in allen hendlen/vñ hantierungen?  
In summa/wir wenden es wie wir wollen/so stoffet vns  
diser Vers für die stirnen/das wir müssen besorgen/ so  
wir dem Propheten nach betten/wir betten vnrecht/vñ  
liegen. Den der meiste teyl sind nit des Herrn/sonder  
des Teuffels knecht/dē dienen sie mit sonderm fleis/vñ  
hüten sich für dem rechten Gottes dienst. Der ander po-  
bel/ lebet auch also/das man eben so wenig heyligkeit  
rühmen kan/als von den Jude/die der König von Ba-  
bel wurget/vnd gefangen weg fürete. Wie reimbt sichs  
nun/das sie der Prophet heylig nennet/vnd knechte Got-  
tes? vnd wie wil solchs in vnserm gebete sich reymen/  
e auff



auff vns/vnd auff die vnsern? Auff solche frag ist  
diß die antwort. War ist's das die Juden ser böß gewes  
sen/vnd mit iren sünden solchen zorn verdienet haben/  
wie man in den Propheten allen sihet/so von solcher Ba  
bilonischen gefengnuß weyßsagen Vnd dennoch nichts  
destweniger/ist es recht/vñ wol vom Prophetē geredt/  
das die Babilonier die knechte vnd heyligē des Herrn  
erwürget haben. Vnd das darumb.

Zu der selben zeit sind die Juden allein Gottes  
volck gewesen. Deñ wo Gottes wort/ vnd Sacrament  
nit sind / da selb kan auch kein kirch / noch volck Gottes  
sein. Ob nun woll in solchem hauffen/der meiste teyl böß  
gewest/so kan man dannoch den gangen hauffen nit ans  
derst/deñ das volck Gottes / oder die kirche Gottes nen  
nen. Denn sie haben Gottes wort vnd zusagung/ haben  
die beschneidung/den Gottes dienst/ Opfer vnd anders  
wie es jnen Gott selb geordnet hat / Werden der halben  
knechte Gottes/vnd heyligen genennet. Nit allein dar  
umb / das vil heyligen/ vnd knechte Gottes vnter jnen  
sind(deñ das wort geht nit gar on alle frucht ab) sonder  
am meisten darumb/das sie den schatz haben/dadurch  
man heylig vnd Gottes volck wird/ob gleich etliche sol  
ches schatzes nit brauchen.

Also nennet Moses die Juden oft Gottes volck  
ob gleich vil böse vnter jnen warden. Paulus nennet  
die kirche zu Corincho/in Galatia vnd andern orten/  
heylig/ob gleich vil vnheylige drinnen warden / vnd sich  
vbel hielten. Vmb der selben willen aber sol ye die kirch  
ires rechten namens nit beraubet werden. Deñ ausser  
halb der kirchen wird man keine knecht / noch heyligen  
Gottes finden.

Vnd diser vsach halb/vngehindert das der meiste  
teyl



teyl vnter vns böß ist/ können wir auch mit warheit dem  
Propheten hie nach betten vnd sprechen/ das der Türck  
die knechte Gottes / vnd heyligen Gottes vmbbringe.  
Denn wo wil man sonst knechte Gottes vnd heyligen/  
den vnter den Christen/ finden/ so allein Gottes wort vñ  
den heyligen Geist haben/ dadurch man heilig würdt?  
So sind je alle Christen in den tod vnsers Herrn Jesu  
Christi getauffet/ ob sie gleich solche tauff nit alle brauch  
en wie sie solten. Item sie haben die zusagung/ das sie  
Got zu kindern annemen/ vnd durch Christum ire sün  
den jnen schencken wölle. Derhalb ob gleich der ganze  
hauff nit from ist/ so kan er doch anderst nit/ den heilig  
gerümet vnd geheissen werden/ solcher treffenlichen ga  
ben vnd zusagung halb.

Zum andern/ ist das auch war/ das vil rechter heys  
ligen vnter solchem hauffen sind vnd vñkommen/ wie son  
derlich das junge vñschuldige gesind ist/ das noch rein an  
seiner tauff bleibt/ vñ durch mutwilliges sünden / wider  
Gott noch nit sich versündet hat/ wie wir alten thun.

Zum dritten / ist es war / wie oben gemeldet / das  
alle Christen den schatz der heyligung/ inn der tauffe ent  
pfangen. Ob nun woll/ der meiste theyl inn sünden lebt/  
vnd solcher gnad nit brauchet/ wer ways / wie sie in den  
lezen nöten abscheiden/ wann sie vom feind also gedran  
get/ vnd vbermannet werden. Ich achte mancher bette/  
vnd seufze zu Gott/ wie der schecher am Creutz / der sich  
zuuor außser der not wenig bettens geachtet hat. Nun  
aber will Got den sündler durch Christum zu gnaden an  
nemen/ wen er gnad begert / vnd sich bekeret. Aber also  
kan kein Türck sterben/ der von Christo nichts ways/  
noch glaubet/ auch die zusagung der seligkeit in d tauffe  
nit empfangen hat/ wie wir Christen/ die darumb billich



knecht Gottes / vnd heylige leut genennet werden / ob wir gleich vnser person halb sündhafft vnd böß gewesen sind.

Zum vierdten / so last vns auch auff des feindts meinung sehen. Ist es nit war / wir seyen vnser person halb wie wir wollen / da ligt dē Türcken wenig an / aller haß vnd grīm wider vns kompt daher / das wir Christen heissen / vnd seinen Teuffel / den Machomet nit wollen für ein Apostel Gottes halten. Also / ob wir gleich vnser person halb nit Gottes knechte sint / so helt vns doch der feindt dafür / vnd verfolget vns darumb.

Derhalb mögen wir vns auch des Gottes feindts meinung nach / für Gottes knechte rühmen. Aber diß ist nit die fürnemste vsach / vñnd ist dennoch auch darumb zu bedencken / auff dz wir vns vnser beruffes dabey errinern / nit in sünden fort faren / wie Türcke vnd Juden thun / die des Teuffels knechte sind / sonder vns wie knechte Gottes / heylig vnd from halten / vñnd nach Gottes willen leben / auff das wir mit der warheyt vns knechte Gottes rühmen mögen / vnd Gott vsach habe / die verdienten straffe von vns gnedig abzuwenden / vñ vns zuhelffen.

IIII. Wir sindt vnsern nachbahren ein schmach worden / ein spott vnd hon denen die vmb vns sein.

Bissher hat der Prophet zwey stück geklaget / das der Gottes dienst gar zu boden gangen vnd ein grewliches morden von dem feindt verbracht sey. Jetzund fasset er das drit stück darzu / welches solchen schaden vñ plag noch grösser macht / Nemlich / das ergernuß so daraus folget / bey den vmbligeden Heyden. Dann weil  
Gott



Gott kirchē vnd volck/ mit einander hat verwüsten laſſen/ ſo können die heyden anderſt nit dencken/ den Gott hab weder an kirchen noch volck ein wolgefallen/ ſonſt ſolt er je drüber halten/ vnd nit bedes ſo jemmerlich verwüſtē laſſen. Folget d̄ halb ein doppelter vnrhat draus. D̄ die Heyden erſtlich inn dem argwon geſtercket werden/ der Juden religion vnn̄ Gottes dienſt ſey nichts werdt/ ſonder falſch vnd got vngefellig. Darnach/ das ſie von irer abgötterey je lenger je mer halten vnn̄ verbeinter darauß werdē/ als der ſie in dem genieſſen/ das es ihnen nit ſo vbel gehet/ wie den Juden.

Vñ ſolches ergerniß/ iſt nit allein bey den Heydē/ ſonder auch wol bey dē volck Gottes ſelb/ wie wir ſehen im Propheten Hieremia am. 44. da ſelb ſagen die Jude frey öffentlich/ Da wie der hymel Königin reucherten vñ tranckopffer opfferten/ da hattē wir auch brodes gnug/ vnd gieng vns woll vnd ſahen kein vnglück. Sint der zeit aber wir haben abgelaſſen der hymel Königin zu reuchern/ vñ tranckopffer zu opffern/ haben wir allen mangel gelidten/ vnn̄ ſind durch ſchwerdt vnd hunger vmbkommen. Wie ſihet man klar/ das die Juden auff dem wohn ſind/ weyles in bey der predigt Hieremie vbel geht/ das ſie es für ein lügen predig halten. Widerumb weyles in bey der abgötterey hat wolgangen/ das ſie es für kein abgötterey/ ſonder für einen rechten Gottes dienſt halten.

Leben wie vnſere Papiſten noch thun. Vor diſer zeit/ ſprechen ſie/ iſt gute zeit vnd alles gnug geweſt/ bald aber der Luther auffgeſtandē/ vñ das Euangelion vn̄ter die leut iſt kōmen/ da hat ſich/ auffrur/ krieg/ teure zeit/ peſtlentz/ Türck vñ alles vnglück gefunden. Schließender halb es muße mit ſolchē Euangelio eitel Būberei



sünd vnd lügen sein/der alte glaub( wie sie es nennen/)  
sey der rechte glaub.

Aber wie antwortet der Prophet Hieremias seynē  
Juden? Ich meine ja/spricht er/ Der Herr hab an solch  
es reuchern vnd opfern gedacht/ so jr in den stetten Ju-  
da/ vñ auff den gassen getriben habt/ Er hats zu hertze  
genommen/vnd ewren bösen wandel vnd grewel/ die ir  
thettet/nit mer leyden können. Keret also der Juden  
meinung gantz vnd gar vmb/ vnd schleußt/ das es jnen  
nit der abgöttereyen halb wol gangen habe/ sonder der  
abgöttereyen halb/ gehet es jhn yezund vbel. Wie wir  
auch mit der warheit mögen sagen/ das alle plag vñnd  
straff/so yezundt gehet/ lengest mit der greulichen ab-  
götterey/ in dem Bapsthumb/ ist verdienet worden.  
Den Gott helt mit der straff an sich/so langer kan. Wie  
Paulus Rom.2. Got sey reich vñ gnad/gedultig vñ läg  
mütig/das er vns zur buß leite. Wo wir aber/ nach vn-  
serm verstockten/ vnd vnbusfertigen hertzen vns den  
zorn hauffen/vñ von sünden nit ablassen wollen/ da kan  
entlich die straff nit ferner auffgehalten werden.

Vnd sonderlich erfahren wir es mit vns/vnd sehens  
in allen historien der heyligen schrifft/ das die straff als  
denn allerst ist angangen/wen zuuor Gottes wort/vñnd  
die rechte predigt vnter die leut ist komen. Denn solches  
eylet die straff/das Gott sein wort darumb schickt/ das  
wir von sünden ablassen vnd vns bessern sollen. So wol-  
len wir des worts nit achtē/sonder faren fort in vnser ab-  
götterey/vnd allen sünden on besserung/ Wie köndte es  
den wol zugehn?

Also ist es ein ergernuß/nit allein bey den Gottlo-  
sen Heyden/wen sie sehen das Gott mit der straffe die  
drücket/die sich seines namens/vnd des rechten Gottes  
dienst



diensts für andere rhümen / sonder auch wol bey dem  
volck Gottes. Nun aber / gleich wie Gott allenthalb  
hefftig verbeut / man sol niemandt ergernuß geben / als  
so mag er es seer wollleyden / das man wider die ergers  
nuß bette. Den solchs heisset eigentlich vmb die heylis  
gung seines namens betten. Vnd sind exempel gnug als  
lenthalb / das Gott solche ergernuß zuuerkommen /  
gernhilfft / vnnnd die bösen Buben straffet. Wie son  
derlich der 125. Psalm tröstet: Der gottlosen Scepter  
wirdt nicht bleiben vber dem heufflin der gerechten /  
auff das die gerechten / ir hand nicht außstrecken zur vn  
gerechtigkeit. Der halb bettet der Prophet bald auff  
solchen trost mit disen Worten. Herr thu wol dem gu  
ten vnd fromen hertzen. Die aber abweichen auff ire  
krüme weg / wirdt der Herr weg treyben / mit den vbel  
thettern / fride sey vber Israel.

Vnd dises stuck reimet sich sonderlich wol zur ge  
genwertigen sachen vnd not / da wider wir bitten. Den  
man sihet / wie der Türck so mütig drauber wirdt / das er  
solchen sig vnd glück / so vil jar her / wider die Christen  
gehabt. Streckt also bis vber die ohren in dem ergernuß /  
vnsrer glaub sey falsch vnd vnrecht / sonst würd es vns  
nit so vbel gehn. Widerumb sein glaub sey gerecht / vnd  
gut / sonst würd er nit so vil glücks / vnnnd sighafften zu  
schlags haben. Feret also mit gotslestern / mit morden /  
vnd aller wütere y fort / wie in das glück treybet. Der  
halb wir sonderere vsach haben zu bitten / das doch Gott  
mit sein seggen bey vns stehn / vnd also für aller welt be  
weyssen wölle / ob wir gleich vnser sünd halb Billich ge  
straffet werden / das dennoch vnser glaub / der rechte vn  
einiger Gott wolgefelliger glaube sey / auff das der feind  
nit immer dar vns lestere vnnnd schmehe. Denn solche  
schmach



schmach trifft mit allein vns / sonder auch den son Gottes / vmb welches willen / der feindt vns verfolget / ob wir gleich dē vrtheyl Gottes nach / vnser sündhalb / solch verfolgung tragen müssen.

Dan wir sollen nit / wie die Türcken / vns an solchem vrtheyl vnd gericht Gottes ergern / als glaubte darumb der Türck recht / vñ wir vnrecht / das es im glückselig vnd wol / vns aber vbel vnd vnglücklich geht. Dan das es vns vbel geht / ist nit des Chrißlichen glaubens oder vnser tauff / sonder vnser sündē schult / welche Gott darumb auff solch weyße straffet / das wir dauon ablassen vnd vns bessern sollen. Wo solchs geschähe / da solte wol des Türcken saybel bald stumpff werden / vñd nit so schneyden vñ haben / wie bißher. Den allen sig wider vns / hat er von vnsern sünden / die verklagen vnd schlagen vns ehe für Gott / denn vns der Türck schlegt. Wer aber vor Gott sein sach verlorn hat vñd geschlagen ist / der würdt sich langsam der schleg bey den leutē erwehren können / es müßten es ehe junge kinder on alle schwerdt vnd spieße thun.

Also gehet diser vierde vers auff das ergerniß / das da folget bey dē gegentheyl / wo Gott mit der hilffē ausßen bleiben vñ retten wölt. Wir aber müssen heutigs tags auch eins andern ergerniß vns besorgen / das in der warheit nit gering ist / vñd zu fleissigem gebet vns solle bewegen. Wir haben es nun lenger den 20 jar erfahren / wie bitter feindt vns der Papst vñ sein geschworne hauffe ist. So nun (da Got für sey) der Türck vberandt nemet vnd (wie es der Papisten höchstes wünschen vñ begern ist) vnserm theyl so von des Papsts kirchen abgefallen vñ andz rechte wort sich begebē hat / ein vnfall begegnet solt / wie solte da woll ein jubilieren vnd frolocken sein? wie



Wie solte man dz Euangelion vñ anders/so dem Bapst  
thumb entgegen/vns für rücken: drüber lachen/vnd al-  
len lust an vnserm vnglück haben? Derhalb sollen wir  
bitten/solcher giftiger feinde halb(vnd würdt ob Gott  
wil solch vnser gebet Gott angenehm/vnd gewiß erhört  
werden) das es Gott nit dazu wölle kommen lassen/vnd  
seines worts vñ kirchen verschonen/auff das die lesterer  
sich nit vber vns frewen/vns spotten vnd honen mögen.  
Die nit allein vns/sonder der rechten leer vnd heyligen  
Euangelion so feind sind/das sie sich hören lassen/sie  
wolten chr Türckisch den Lutherisch sein. Gott verges-  
be ihnen soche lesterung/oder laß vns der selben nit mit  
ihnen entgelten. Amen.

## Der ander theyl des Psalmen.

Herr wie lang wilt du so gar zürnen/vnnd dei-  
nen euer wie ferner brinnen lassen?

v.

Bis her hat der Prophet Flagt vber den jamer so  
von dem König zu Babel im Jüdischen Land ist ange-  
richtet worden. Jezund hebet er an zu bitten/vnd ist vber  
die massen ein schönes gebet/da man den Meyster den  
Heyligen Geyst allenhalb an spüret. Nun aber sollen  
wir deß gewiß sein/weil der heylig geyst vns also vorbe-  
ret/vnd will/das wir jm nach betten sollen/das solches  
gebet auch gewißlich Gott ein angenehmes gebet werde  
seyn/das er erhören/vnd vns gewehren wöll. Sintemal  
wir nit allein betten/sonder wir betten dē heyligen geyst  
nach vnder/der heylige geist bettet mit vns/vnd vertritt  
f vns



uns mit vnaussprechlichen seuffzen. Solche zuuersicht  
sol vor allem ding/bey disem gebet sein /so wir anderst dis  
sen Psalm wollen recht nachbeten / vñ dennoch sol man  
Gott kein zeyt/zil/ noch mittel stellē /wie oder wen er helf  
fen/vñ dē Türcken wehren sol/das es also bedes bey ein  
ander stehe. Erstlich das man nit zweyffle / Gott wer  
de eygentlich seiner Christenheit helfen/vnd dem tyrann  
nen/vnd Gottes lesterer wehren. Zum andern das wir  
in mitler zeit solche straff geduldig tragen/welche wir/  
mit vnsern sünden/vñ vngheorsam gegen das wort/wol  
verdienen haben/wie der Prophet vns hie ein feines ex  
empel vortregt.

*Nota* Herr/spricht er/wie lang wilt du so gar zurnen / vñ  
deinen euer wie fener brennen lassen. Bekennet erstlich  
das es ein zorn sey /das ist/das solche straffe wol wer auf  
sen bliben / wo man nit Gott mit den vilfaltigen sünden  
dazu genötiget hette. Darnach bittet er / das doch  
Gott damit ein ende machen/vnd nit immerdar also zorn  
nen wölle. Als wolte er sagen/wir leyden billig/sind auch  
zum leyden nit vngeduldig. Nur allein bitten wir / du  
wöllest doch einmal zurnens auffhören vnd wider gene  
dig sein.

Sölches würde der Prophet nit sagen /noch beger  
ren dürffen/wenn er nit wesse/dz Gott genedig wer/vñ  
an einer kleinen straff sich wolte settigen lassen. Wie der  
Prophet Micheas auch saget / wo ist solch ein Gott wie  
du bist/der die sünde vergibt / vñnd erlast die missethat  
der vbrigen seynes erbtheils/der den zorn nit ewigklich  
behelt. Vñnd Esaie am drei vñnd sechtigsten. Du zür  
nest wol / da wir sündigten / vñnd lang darin blie  
ben/ vns war aber dennoch geholffen. Vñnd der 103.  
Psalm. Barmhertzig vñnd genedig ist der Herr/geduldig  
vñnd



grossen gütē/er wirdt nit immer hadern/nach ewiglich  
zürnen. Wer solchs glaubet vñ für war helt/der kan des  
frölicher mit dem Propheten betten vnd sage. Herz wie  
lang wilt du so gar zürnē? Den er weys/ob wol Gott zür  
net/das es doch ein solcher zorn ist/der/wo man sich recht  
dargegen schicket/sein ende hat vñ nit ewig wehret. Wie  
der Prophet Esa. am 27. auch tröstet/vnd sagt. Gott  
schlage wol sein volck/aber doch nit also/wie es 8 feinde  
schlegt. Denn Teuffel vnd welt haben einen vnendlichē  
en zorn/vnd woltens gern mit wurtzel/vnd gar ausrot  
ten. Aber Gott richtet sein volck mit massen/das ist/er  
schlegt nit zu/das er vns gar verderbē wölle/sonder das  
er der sünden wehre vnd vns zur Buß bringe. Wer also  
die straffe braucht da/selb höret der rauhe wind der an  
fechtung(wie es der Prophet nennet)auff/vnd leuchtet  
widerumb die liebliche schöne Sonn/göttlicher hilff vnd  
genaden/wie man allenthalb in der erfahrung sihet.

Solches gebet aber/das der Prophet spricht/Herz  
wie lang wilt du so gar zürnen/fasset auch in sich ein sehr  
schöne vñ nütze leer. Dañ erstlich müssen wir ye bekennē/  
weyl der Prophet klaget vber den zorn Gottes/das Gott  
durch vnser sünd/zu zorn Beweget/vñ die selbe one straf  
fe nit wille abgehen lassen. Derhalb wir Gott fürchten/  
von sünden ablassen/vnd vns bessern sollen/so ferren  
wir anders der straffe gern wolten entlediget sein. Zum  
andern/weyl 8 Prophet anzeigt/ob Gott gleich zornet/  
das er dennoch nit wölle ewewig/vnd jmer dar zornen.  
Solchs sol vns bewegen/das wir in der anfechtung nit  
kleinmutig/nach verzagt werden/sonder hilffe gewar  
ten/vñ vnser vertrauen allein auff Gottes gnade setze.  
Auff das wir also Gott fürchten/vnd ihm trauen sol  
len. Welchs der höchste vnd beste Gottes dienst ist.



Das aber der Prophet nit allein sagt / Gott zorne / sonder sein euer brenne wie feur / solchs hat auch sein sonder meynung. Denn dz wortlein Euer ist etwas hefftiger denn zorn. Vnd wil der Prophet dise zwei stück damit anzeigen / Das erstlich Gott von vns groß vnrecht geschicht / Wenn wir durch sünde von jm abweychen. Denn weyl wir alles gutes / leyblich vnnnd geystlich von jm haben / so solten wir je billich vns auch seines willens halten / wie ein eheweib ihres ehgemahels / da si eh vnd gut von hat. Thun wir es aber nit / vnd vergessen des gehorsams / den wir Gott schuldig sind / so ist es vnmüglich / das Gott solchen vndanck / vnd sünde solt leyden / vnnnd nit ernstlich straffen.

Zum andern zeigt das wortlein Euer auch diß an / das Gott nit allein darumb straffet / dz wir von jm abgewichen / vñ vnrecht thun haben / sonder auch darumb / dz wir die sünde erkennen / dauon ablassen / vñ vns wider an ihn begeben sollē. Wie Paulus sagt 1. Cor. 11. Wenn wir gerichtet werden / so werden wir vom Herrn gezüchtigt / auff das wir nicht / sampt der welt verdambt werden. Also laufft bey dem zorn noch gnad vnnnd liebe. Denn der euer brennet nit darumb / das wir also in vngnaden bleiben / vnd drinn verderben sollen / sonder das wir vñkeren / vnnnd wider zu gnaden sollen kōmen. Also / ob gleich diser Vers ein rechtes gebet ist / welchs wir dem heyligen Geyst / ernstlich sollen in gegenwertiger not / nach betten / so ist doch auch ein vermanung / (so wir wollen / dz vns sol geholffen werden) dz wir auch in Gottes furcht leben / vñ all vnser vertrauen auff sein gnedige hilffe setzen sollen. Wer solchs nit thut / der würd die wort on verstand / oder / wo ers gleich verstehet / doch on alle frucht nach betten. Nun folget weyter in gebet. Schut



Schutt deinen grām auff die Heyden/ die dich VI.  
nit kennen/ vnd auff die Königreich die  
deinen namen nit anruffen.

Im anfang hat er mit einem wort die feind angeta-  
stet/ das er sie Heyden nennet/ vnd ist je war/ ein vnbil-  
liger handel ist es/ das Heyden wider die knechte vnd  
Heyligen Gottes obfigen sollen. Aber hie greift er inen  
bas in die wollen/ vnd verklagt sie vber die massen heff-  
tig vor Gott. Ach Gott/ spricht er/ so du je zornen wilt/ zör  
ne doch mit den Heyden vnsern feinden auch/ die dich  
nit kennen/ das ist/ die nichts von dir wissen/ vnd dein  
nit achten/ Die mit lehr vnd leben entwicht sind. War-  
umb lebst du sie also ledig außgehn/ vnd rechnest mit vns  
so gnaw? Sie sind reich/ haben grosse macht/ vnd Kö-  
nigreich/ aber trotz/ das sie dir drum danckte/ oder dich  
solchs ihnen zu erhalten/ anruffeten. Sie dencken/ sie ha-  
bens von ihnen selb/ vñ brauchens nach irem mutwillen/  
als dorfften sie dir kein rechenschaft dauon geben. Da-  
wer je not vñ vrsach gnug zu zornen/ das du deinen grām  
wie wasser auff sie schüttest/ vnd sie irer vnzucht halb  
straffest. Macht also das gebet doppelt/ Den er bit für  
sein volck/ vnd wider die feind/ wie wir denn auch thun  
sollen.

Hie mocht man dencke/ Warumb gedenckt der Pro-  
phet nit anderer sünden auch/ so er doch die Heyden ver-  
klagen/ vñ Got wider sie bewegen wil. Den on zweifel/  
werden sie sunst vil andere vntugent an ihnen gehabt ha-  
ben. Gleych wie wir/ so disen Psalm wider die Türcken  
betten/ vnzelich andere mer sünd ihnen für rucken kön-  
nen/ die vor die welt ein weit grossers ansehen habē/ den  
das sie Gott nit kennen/ vnd ihn nit anruffen.



Aber diese zwei sünde / welche der Prophet hie meldet / sind eigentlich die fürnemisten vnd größten sünde / die Gott am allerwenigsten dulden vnd leyden kan. Den Gott nit kennen / heist nit allein / dz man nichts von Gott weys. Den da würd weder Türck / noch Jude sein / der sich solchs Beredē lasse / er kene Gott nit / oder wisse nichts von ihm. Sonder es heist / Gott nicht fürchten als ein Gott / der alles vnrecht straffen wölle / Vnd Gott nit vertrauen als ein Gott / der vmb Christus willē gnedig sein / vnd die sünden vergeben wölle. Solches aber sind sünd die nit hernider / in den gemeinen hauffen der andern Tafel gehören / sonder / gehören in die erste Tafel / vnd das erste gebot / da Gott spricht. Ich bin dein Gott / du solt kein andere Götter neben mir haben. Das ist / Du solt ausser mir / niemandt fürchten / noch vertrauen. Vñ wie kan es möglich sein / wo solche sünde ist / da man Gott nit kennet / das Gott ein gefallen / an den leuten haben könne? wenn sie gleich alles thaten vnd liden / das zu thun / vnd leyden möglich ist? Derhalb ist ein sehr hartes wort das der Prophet sagt: Es sind Heyden / die dich nit kennen.

Die ander sünd ist / Sie ruffen deinē namen nit an. Da müssen wir nit dencken / als solten Türcken vnd Juden gar nichts betten. Denn gleich wie vnser Bepstische Mönch vnd Pfaffen vil bettens haben / also betten Türcken vnd Juden auch vber die masse vil. Vnd wir sollen nit dran zweiffeln / Die Babilonier werden auch vil gebeter haben / Vnd dennoch schilt sie der Prophet / das sie des Herrn namen nit anruffen. Derhalb lige es an dem / das man es recht verstehe / was da sey den namen Gottes anruffen.

Denn / das kan woll sein / wie Mönich vnd Nonnen pflegen



pflegen/das man mit dem munde vil Psalmē oder Vatter vnser bette / vnnnd doch mit ein wort den Herrn nit anruffe. Vrsach/anruffe/muß mit dem hertzen geschehe / Wo dz hertz gegē Gott sich auffthut / vmb hilff schreiet / vnd derselben gewiß gewartet / vmb Christus willē / da ruffet man Got recht an / das selb will er auch hören / vnd mit gnaden sich finden lassen. Solches spricht der Prophet / thut der gotlose feind nit / er suchet nit hilff von Gott / sonder verachtet Gott / vnd wenn es jm woll gehet / denckt er / er hab es von sich selb / geht es jm aber vbel / so suchet er widerumb hilff nit bey Gott / sonder bey sich / bey andern leutē / beim Teuffel selb / oder verzweiflet / wo er kein hilff findet.

Ja sprichst du / warumb gibt den Gott solchen leuten den sig / die von im nichts wissen / vnd jn nicht anbeten. Kan man dann zum sig ausser Gottes hilff vnnnd willen kommen. Nein / der sig kompt allein von Gott / Darumb aber sigen die Türcken wider vns / vnd die Babylonier wider das volck Gottes / das Got also vnser sünde straffen will. Die selben vnd sonst nichts / machen die gotlosen buben so glückhafft. Dann weil wir Gott mit vnsern sünden zur straffe nötigen / so lest ers gehn / vnd ligt jm nit dran / es thue es der Teuffel oder Türck / allein / das alle welt seinen willen erkenne / vnd jn fürchten lerne / als einen solchen Gott / der seinem eigenē volck nit will verschonen / wo sie nach seim wort / vnnnd willen sich nit halten / vnd on alle Bußfertigkeit in sünden fort faren wollen.

Diß gebet aber sol eben / wie das vorige / vns einer innerung / oder vermanung sein. Denn weil der Prophet vnd wir begern / das Gott darumb den feinde straffen sol / das er Gott nit kennet / vnd seinen namen nit anruffet



ruffet / so sollen wir für solchen sünden vns mit fleys  
bewaren / Gottes wort gern / vnd vil hören / auff das wir  
Gott recht erkennen lernen / vnd vns stetigs im glauben  
vnd gebet vben. Nun aber / ist oben gemeldet / wie ein  
Christ sol betten / Nemlich / im namen Jesu Christi / das  
Gott vmb seines Söns willen / vns hören vnd erlösen wöl  
le. Solchs wissen wir / das der Türck nit kan / Juden  
auch nit / Papisten auch nit / sonst würden sie nit inn der  
Heyligen namē vmb hilff / vnd erhörung bitten. Derhal  
ben würdt die straffe mit ihnen endlich nit aussen bleibē /  
auff das dem Herrn Christo sein nam vñ ehr nit verlestert  
werde.

V II.

Dann sie haben Jacob auffgefressen vnd  
seine heuser verwüstet.

Er helt eben die ordnung wie vor / das die Heyden  
Gott nit kennen / vnd seinen namen nit anruffen. Solchs  
sind sünde / die gehören in die ersten taffel. Das sie aber  
durch blütuer giessen / das landt wüst machen / gehört in  
die ander taffeln / vñ sind bedes sünde die Gott nit will vn  
gestraffet abgehen lassen.

Nun ist es woll war / das durch den namen Jacob /  
allenthalb das volck Israel inn den Prophetē verstandē  
würdt / aber nichts dest weniger hat es hie sein sonderere  
meynung das er das volck Israel Jacob heisset / den er  
seheth auff die verheissung / welche Gott dem Jacob ge  
ben hat / das er ob seinen nachkommen halten / sie segnen  
vnd in allerley nöten erledigen wölle vmb Christus wil  
len. Solche verheissung slichtet er mit ein / auff dz Gott  
dran gedencen / vnd sich mit genaden wider zu yhnen ke  
ren wölle.

Ob wir nun solchs wort Jacob / auff vns nit kōn  
nen



nen deuten/denn wir sind nit Jacobs nachkommen/wie die Juden/so sind wir doch der geystlichen zusagung von dem Herr Christo teylhafftig wordē/welcher dem Jacob verheissen ward. Wie denn Paulus auch dise Abrahams kinder heisset/die Abrahams glauben haben/ ob sie gleich der fleischlichen geburt halb/ seine kinder nit sind. Nun diser rechnung nach können wir/ die Christliche Kirche/den Jacob heissen/sintemal die Christliche Kirch/glaubet an die verheissung/ so dem Jacob versprochen/vnnd hernach seinen nachkommen/geleistet ist worden.

So vil aber die meinung diß vers belanget/ ist es leyder vor augen/ das wir dises stuck dem Propheten mit aller warheit können nach betten. Denn gleich wie der Prophet wider den König zu Babel klaget/ das er den Jacob/oder das volck Jsrael auffgefressen vnd seine heuser verwüestet hab/Also sehen wir/wie ein jemerlichen riß der Türck in der Christlichen Kirchen thun hat/das nit gar in zwey hundert jaren/ so vil land vnd leut/in Asia/Aphrica/vnnd Europa/sind verwüestet worden/das es yetz alles Türckisch ist/ Da doch züuor so feine/wolgeordnete Kirchen gewesen sind. Solcher jamer solt je vns zu hertzen gehn/auff das/ob wir gleich solchen schaden nimmermer können hereinbringen/wir doch für vns/vñ vnser nachkommen mit ernst betten/das Gott für dem feind vns bewaren/vnnd bey seinem lieben wort/vñ dem rechten glauben/sambt vnsern nachkommen erhalten wölle. Amen.

Gedencke nicht vnserer vorigen missethat/ Er-  
barne dich vnser bald/ den wir sind dünn worden.

Das heist das gebet bald vnd wunderberlich geen  
g dert.



dert. Den er hat bißher vber die feinde klagt/sie geschol-  
ten/vnd wider sie gebettet. Vez lest er von feinden ab/  
vnd bettet für sich/vnd sein volck. Er bittet aber nit wie  
vor/ das er sie für dem feinde behüten vñ schutzen wölle/  
sonder/das er sein volck die sünde vergeben wölle. Was  
drüget den Propheten zu solcher schwinden enderung/  
in so grosser not vnd fahr? Anderst nichts/denn das er  
sicht/wie alles betten vmb hilff/vergebens sey/wo nit  
Gott zu vor/durch sein gnad/die sünde hin weg nimbt.  
Denn weyl die straffe der sünden halb kompt/so kan der  
straffe nit gewehret werden/es sey den vor der sünde ge-  
wehret. Nimb ein grobes gleichnus / Wo ein see oder  
teich auß reisset/ist es nit war/alle mühe vñnd arbeit ist  
vergebens/wo man den riß nit bald zu machet. Vñnd  
wer sonderlich lecherlich / weñ der teich vñden außgeris-  
sen wer/so du oben/oder an ein anderm ort bawen/vñnd  
dem fluß wehren woltest.

Derhalb laufft der Prophet hic dem rechten loch  
zu/vnd will an dem ort stopffen/ da es hilfft/vñnd von  
nöten ist/ Vñnd spricht: Herr/ gedencck nit vnserer  
vorigen missethat. So er jhr nit sol gedenccken / so  
muß er sie vergeben vñnd nach lassen. So ers aber  
vergeben sol / so ist es nit verdienst / sonder gnad  
vñnd barmhertzigkeit. Vñd hie in disem stücklin zeucht  
der Prophet mit ein die verheissung von dem Herrn Je-  
su Christo. Denn außser dem selben/wil Got weder gne-  
dig sein/noch sünd vergeben. Wie die erste verheissung  
im Paradis zeuget/dz durch ihn der schlangen kopff sol  
zutretten werden. Das ist/ durch Christum allein/ soll  
die sünd auffgehoben/vñnd Gottes zorn / so der sünden  
halb erregt ist/ gestillet werden. Also flechten die Pro-  
phetē verdeckter weys/den Herrn Christum in irem ge-  
bet



bet mit ein/ Ob sie gleich ihn mit namen nit nennen/ auff  
das gar kein vnterschied sey zwischen ihrem glauben/ vnd  
vnserm glauben/ zwischen ihrem gebet vnd vnserm ge-  
bet/ ob gleich ein vnterschied ist/ des eusserlichen Gottes  
dienst halb. Denn solches heist je (wie Christus Johans  
nis am 16. leret) jm namen Christi gebetten/ durch weis-  
chen allein/ wir einen freyen zutrit zu Gott haben.

Nun aber müssen wir die wort/ nit so gar oben hin  
ansehen/ sonder ihnen fleissig nach dencken/ was sie mit  
sich bringen. Denn in disem gebet (wie oben zwir gemel-  
det) ist auch ein treffliche/ vnd nötige leer/ der wir wol  
müssen achtung habē. Den der Prophet sagt nit schlecht  
gedencke vnserer sünde nit/ sonder also sagt er/ Gedencke  
vnserer **VORJEIT** sünde nit. Wil also erstlich  
vor Gott/ vnd aller welt beichten vnd bekennen/ das sie  
solche straffe durch die sünde verdienet haben. Solche  
Beicht/ muß vorhanden sein/ wo man vergebung der sün-  
den begeret. Denn wie solt sich das reimen/ dz ich sprech-  
en wolt: Her/ vergebe mir mein sünd/ vñ wolt mich doch  
keiner sünde vor Got schuldig geben/ sonder mich für  
from vnd gerecht halten? Solche lügen köndte Gott  
nit leyden/ noch sein also spotten lassen. Das ist nun das  
erste stuck der rechten buß/ sich für ein sündler bekennen/  
vnd vor Gott selb anklagen/ vnd schuldig geben.

Zum anderen/ bringt das wortlein (vnser Vorige  
sünde) auch dis mit/ das sie nun von solchen sünden abge-  
lassen/ vnd sich gebessert haben. Das ist das ander stuck  
der Christeliche Buß. Den an dem ist nit gnug/ dz man  
sage/ Ich hab gesündigt/ vñ vnrecht gethun/ man muß  
auch dauon ablassen/ vñ es nimer thun. Wo als dan das  
gebet im glaubē geht/ dz man durch Christi vergebung  
sündē bitter vñ glaubt/ da ist die buß recht/ ganz/ vñ vol-  
kommen.



Derhalb/ so wir in diser gegenwertigen not auch  
recht wollen betten / müssen wir das gebet stellen / wie  
der Prophet hie. Das wir nit bloß bitten/ das Gott dem  
Türcken wehren/ sonder/ dz Gott vns vnser sünde ver-  
geben/ vnd schencken wölle. Denn weyl die sünde noch  
auff vns ligen/ so ist der Türck vngeschlagen/ vnd muß  
glück haben. Wie wir leyder den nechsten somer erfahren  
haben / da man so lang für Ofen gelegen/ aber nichts  
außgerichtet/ ja da man die Stat des nachts geöffnet/  
vñ etlich Kriegsvolck schon hin ein in die gassen bracht  
hat/ ist dennoch nichts außgerichtet/ vñ endlich vnser  
volck vberfallen / vnd schentlich erlegt worden. Was  
hat doch jmer mer da gemanglet/ das Got nit bey vns ge-  
wesen/ vnd sig geben hat. Nichts/ den das vnser sünde  
noch auff vns gelegen/ vnd nit vergeben sind gewesen.

Fragest du/ warumb aber die sünd nit vergeben  
sind gewesen. Die stehet die antwort/ Man hat Gott noch  
nie drum gebeten. Denn hette man Gott mit ernst ge-  
betten / so wer auch die besserung gefolget. Weyl aber  
kein besserung gefolget ist/ so ist gewis/ dz man nie recht  
vmb vergebung der sünden gebeten hab. Denn wer  
von hertzen bit / Herr vergib vns vnser schuld / der  
würde je der schulde mit willen/ nit mer machen / sonder  
an dem jm genügen lassen/ was bißher geschehen ist/ vnd  
solchs forter nit mer thun. Denn wie solt es sich doch re-  
men/ das du zu Gott woltest sage/ Lieber vater/ vergib  
mir meine sünd/ vnd woltest doch nichts destweniger in  
sünden fort faren. Wer nit solches mer gespottet / denn  
gebetten?

Darumb/ so wir (wie es die not erfordert) mit ernst  
vmb vergebung der sünde wölle bitten / so müssen wir/  
nur vmb vergebung der vorigen sünden bitten/ das ist/  
in sünden



in sünden nit fort faren/ sonder vns bessern. Wie Paulus sagt. Ephe. 4. Leget die lügen ab/ vnd redet die warheit. Wer gestolen hat/ der stele nit mer / sonder arbeite vnd schaffe mit den henden etwas redlich s. Also/ wer Gottes wort verfolget hat/ der bitte vmb vergebung/ vñ thue es nit mer/ sonder höre Gottes wort mit ernst/ vnd neme es mit hertzen an. Wer geizet/ vnd allein sein nutz/ in hendelen/ mit kauffen vnd verkauffen gesucht hat/ der höre auff/ thue es nimer/ vnd laß im die arme leut besolhen sein. Wer in vnzucht/ fullerey/ hoffart/ vnd andern jamer gelegen/ bessere sich/ vnd thue es nimer. Das heist den recht/ vñ mit ernst mit dem Propheten bitten/ das Got der vorige sünde nit mer gedencken wolle.

In sonderheit aber sol weltliche Oberkeit hie sich erinnern/ weyl Gott an sein volck die abgötterey durch die Babilonier/ also gestraffet/ vnd land vnd leut darumb hat verwüsten lassen/ das sie solchem jamer mit ernst wehern/ nach rechtschaffne Predigern trachten/ Gottes wort rein vnd lauter/ on allen menschen zusatz lassen predigen/ allen falschen Gottes dienst (des im Bapsthum vnzelich vil ist) abschaffen/ vñ den gotlosen verkerten Bischouen nit lenger ins maul sehen/ die so gar nichts zur sachen thun/ das die leut/ durch Gottes wort/ zur forcht Gottes/ vnd ein rechten glauben/ vñ ernstem gebet/ vermanet vñ vnterrichtet würden. Den solchs ist der Oberkeit sonderlich von Gott befolhen das sie falsche leer/ vñ falsche Gottes dienst abschaffen/ vnd rechte kirchen diener verordnen sollen. Wie der ander Psalm sagt: Ihr Könige last euch weysen/ vnd last euch zuchtigen jr Richter auff erden. Dient dem Herren mit forcht/ vnd frewet euch mit zittern. Küßet den Son/ das er nit zorne/ vnd ihr schnell vmbkommet.



Wir nun/die von Gottes gnaden das Euangelion  
rein vnd lautter haben/werden durch dise bit auch erin-  
nert/neben dem/das wir von sünden vñ allem ergernus  
abstehē sollen/dz wir auch vergebung der sündē suchē sol-  
len/wie es vnser lieber Herr Christus zusuchen befolhen  
hat. Wir sind auff vergebung der sünden/in den todt  
Christi getauffet/solcher tauffe sollen wir nit vergessen/  
sonder vns damit trösten/als ein gewissen zeychen/das  
vns Gott durch Christum von sünden erlöset/vnd in sein  
reich genomen hab.

Zum andern/wissen wir den Befelch/welchen Chris-  
tus seinen Jüngern geben hat/sünde auff erden zuuer-  
geben/denen so es begeren/vnd sünde zu behalten/denen  
so es nit begern noch glauben. Derhalb sollen wir solchen  
Befelh nit in windt schlagen/sonder/vns zu Gottes wort  
mit ernst halten/vnd da vergebung der sünden suchen.  
Denn weil Christus solchen Befelch/den Kirchendinern  
geben hat/so können wir der vergebung der sünden ge-  
wis sein/wenn wir von ihnen hören/das durch Christum  
vns vnser sünden vergeben sind.

Zum dritten/so es vns mit solchem gebet/vmb ver-  
gebung vnser sünd rechter ernst ist/so sollē wir vns auch  
offt zu dem nachmal des Herrn halten/in welchem der  
trost von vergebung der sünden/auff das aller gewisest  
vns fürtragen würde. Denn wie kanst du vergebung  
der sünden dir neher bringen vnd gewisser machen/den  
so du im nachmal den leib Christi in deine mund entpfe-  
hest/der für dich gegeben ist/vnd das blut Christi/mit dei-  
nem mund nimbest/dz für dein sünd am Creutz vergossen  
ist. Derhalb/so wir nit oft vñ vil/zum gnaden reichen  
nachmal des Herrn Christi gehen/ist grösse sorg dabey/  
es sey vns wenigerst vmb vergebung der sünden/sinte  
mal



mal/wir die selbe so wol vnd gewiß haben können / aber/  
wir wollen ihn nit/ vnd enthalten vns darvon. So es  
doch Christus zum sonder trost/seiner Christenheyt hat  
eingesetzet/ vnd befolhen/man soles nit ein mal / sonder  
offt thun.

Also erinnert vns diser vers fein/was wir thun sol-  
len/so wir anderst vergebung der sünden mit ernst bege-  
ren. Wo nun vergebung der sünde ist / da würdt auch  
hilff vnd rettung nit lang aussen bleibē/wie der Prophet  
darumb sein gebet jzt weyt anderst stellet/den vor/vnd  
spricht: Erbarm dich vnser baldt/den wir sindt düñ  
worden. Er stellet wol Gott kein zil/ aber weyl er der  
vergebung der sünden gewiß ist/begeret er/das ja Gott  
bald wölle helfen/ denn da hindert Gott nichts mehr/  
sintemal die sünde vergeben sint/vñ treibet ihn die grosse  
not/sintemal wo er die hilfflenger verzüg/der feindt vol-  
let alles vñkeren/vnd verwüsten würde.

Hilff du vns Gott vnser helffer / vmb deines na-  
mens ehre willen/errete vns, vnd vergibe vns vn-  
ser sünde vmb deines namens willen.

IX.

Dies ist der außbund von disem gebet/vnd der beste  
vers/jnn disem Psalm. Denn ob wol der Prophet an-  
zeigt hat/wie sie von sünden abtretten/vnd nun frümer  
sind worden/so spricht er doch nit/das Gott vmb solcher  
besserung willen helfen wölle. Er lest solchs jnn sein  
werdt bestehn/vnd helt sich an ein gewisers/ da er woll  
weys/das es jm nit mag felen/vnd spricht. Hilff vns vñ  
deines namens ehre willen/das ist/thu es vmb deinet wil-  
len/das man erkenne/das du der rechte Gott seiest vnd  
die



die Heyden nicht ferner dichestern/sonder fürchten vñ  
für den rechten Gott bekennen müssen. Welche yetz in  
vnserm vnfal/rhümen/ als haben wir keinen rechten  
Gott/ sonder du seyst ein amechtiger Gott/ der du nit  
helffen/noch vns retten kōnest.

Solchs gebet/solte man je/mit gewisser zūuersicht  
der hulff/betten kōnnen. Denn da stehet algeret Got-  
tes wort/vnd befelch im anderen gebot/ Du solt den na-  
men deines Gottes nit vergeblich füren. Das ist/du solt  
Gottes namen ehren/heer vnd schön halten. So nun  
Gott vns solchs befolhen hat zuchun/ so muß gewißlich  
folgen/wo wir sein namen zu ehren etwas bitten/das er  
solchs hertzlich gern geben/vnd gern dazu helfen wölle/  
das sein nam vnter vns geheyliget werde.

Sonderlichen aber merck hie/ wie der Prophet/  
eben/da er vmb die ehr des namen Gottes bittet/Gottes  
namen so fein auch ehret/das er Gott seinen helffer heis-  
set. Wie der Prophet Esaias am 63. auch thut/ da er  
eben für solche not bittet/vnd spricht: Du Herr bist vn-  
ser vatter/vnd vnser erlöser/von alters her ist das dein  
name. Das ist ein nam/der sich ser vbel mit der that rei-  
met. Denn sol der ein helffer heysen/ der so jemerlich/  
on rettung/sein volck fangen/weg füren/erwürgen/vñ  
auff das aller jemerligst handeln lest? Aber solches lest  
der Prophet sich nit hindern. Den er sihet/ was seinem  
volck für vnfal begegnet hat/das die schuld nit Gottes/  
sonder ihr eigen sünd/vnd verdienst ist/die solcher straff  
nit haben wollen geradten/sonst hetten sie sich Gottes  
wort/vnd willen nach gehalten. Derhalb wil er Gott  
seinen namen nit nemen/ob es jnen gleich vbel gangen  
hat/vñ heisset in einen Helfer/der anderst nit kan/noch  
wil/dann helfen. Vnd auff das er möge helfen/lest er  
auch



auch die straffe/ vnnnd ruten gehn. Denn wo Gott nit  
drein schlage/ mit dem Türcken/ vnd andern vns plage  
te/ so führen wir jmer in sünden fort/ vñ gedechten nit ein  
mal/ wie wir vns besserten.

Das er aber zñ schlegt/ geschicht/ wie Esaie am  
ersten stehet / das wir von sünden abtēren/ vnnnd vns  
zñ im beteren sollen/ auff das er vnser helffer sein möge.  
Der halb ist es ein feines wort/ dz er Gott **VNSER**  
**HELFFER** heisset/ auch dazumal/ da er noch vmb  
hilff schreyet/ vnd kein hilff noch sihet. Denn der glaub  
richtet sich nit dem nach/ das man sihet/ sonder/ hoffet  
deß/ so man nit sihet.

Wer nun Gott für seinen helffer hellt/ der würdt  
nit ferner hilff bey den leuten suchen / den Gott Befol-  
hen hat. Nemlich also/ das man doch keinen trawen  
auff menschen/ jhr gelt/ gut/ weysheit / noch gewalt  
setze / sonder alle hoffnung allein auff Gottes schutz/  
vnd hilff beruhen lasse. Denn solcher schütz ist allein  
gewiß/ feylet vnd treuget nit. Er ist die feste burg/ vnd  
der fellsichte grund/ der in allen nöten halten/ vnnnd alle  
sturmwinde auß stehen kan.

Wenn wir aber Gott/ vnsern helffer heysen / so  
müssen wir auch wissen / wie er ein helffer sey / sonst  
würdt er solchen namen nit lang bey vns erhalten.  
Denn fleisch vnnnd blüt leß von seyner art nit. Das vn-  
glück thut jm wehe / vnd wolt sein gern bald loß sein.  
Verzeuchet sich aber die hilff/ so denckts/ es sey kein hilff  
mer zugewarten/ vnd wendet sich anders wo hin/ denn  
zu Gott/ vmb hilff. Gleich aber wie wir vnser art ha-  
ben / vnd behalten/ ob es gleich woll ein böse sündhaffte  
art ist/ also hat dagegen Gott auch sein art/ vnd behelt  
sie/ das er ein helffer heist/ vnd ist. Aber doch kein ander  
h helffer



helfer / denn der 9. Psalm sagt / der also spricht: Der Herr ist der armen schütz / ein schütz in der not. Das ist / er wil helfen / es mus aber zuuor not da sein. Denn ist nit not da / so danckt man im dest weniger.

Nun feylet es aber hie an vns / das wir die not nit recht deuten / Dencken jmer dar / vnser Herr Gott bleibe zu lang auß. Aber da sollen wir im vber trawen / das er allein / vnd wir nit / das rechte not stundlein wisse / vnd treffen könne. Der halb (da Gott vor sey) wenn gleich vnser volck / so yetzt in zimlicher rüstung ist / ein schaden von dem feind leyden / vnd erleget solt werden / Da ist zu besorgen / es möchte alle hoffnung vns empfallen / vnd yederman nur auff die flucht gedencen. Aber sind wir Christen / so sollen wir gewis sein / das not stundlin würde Gott nit verschlaffen / sonder sein namē zu ehre / mit der hulffe sich sehen lassen / auff das er solchen namen erhalten / vnd von vns / als **VIRI HELFERS** möge gerhümet werden. Solchs sollen wir gewißlich glauben / vnd keinen zweiffel dran haben.

Im andern teyl dises vers / setzet er bede not zusammen / das Gott erretten / vnd sünde vergeben wölle / wie es dan bedes muß bey sam sein / so anderst vns sol geholffen werden. Wenn wir nun solchs wünschen vnd betten / so sollen wir / wie oben gemeldet / im glauben nit wancken / sonder wissen / das wir dem heyligen Geist nachbetten. Ja das er / der heylige Geist / mit vns bettet / vnd gewißlich solches gebet würd erhört werden / es geschehe gleich wenn es dem lieben Gott eben vnd gefellig ist.

Warumb



Warumb leßest du die Heyden sagen/ Wo ist nun  
ih Gott? Laß vnter den Heyden für vnsern augen  
kündt werden die rache des bluts deiner knechte/  
das vergossen ist.

x.

Diser Vers hat schier ein meinung mit dem vierds-  
ten/ In welchem der Prophet das ergetnuß anzeucht/  
so aus solchem vnfall des volcks Gottes erfolgt ist.  
Denn der gottlose feind kan sichs nit massen/ er würde  
frech vnd stolz/ von so vil grossen vnd trefflichen sige.  
Solche stolz aber/ treybet ihn nit allein wider vns  
menschen/ sonder auch wider Gott im himel. Das er  
fest auff dem bestehet/ vnser glaub/ vnd Gott sey bedes  
falsch/ vnd nichts. Sonst wo vnser Gott ein Gott/ vnd  
vnser glaub recht were/ würde mer glücks bey vns sein.  
Widerumb wo sein glaub vnrecht wer/ Würde weniger  
glücks bey im sein.

Von solcher lesterung meldet der Prophet hie auch/  
vnd spricht. Ach Gott warumb leßest doch die heyden sa-  
gen/ wo ist ihz Gott? Laß es kündt werden/ vnd bey vn-  
serrn tagen/ das wirs mit vnsern augen sehen/ dz du rech-  
ter Gott/ vnd wir dein volck/ vnd erbe sind / deren blüt  
du nit wilt vngerochen lassen. Vnd bindet der Prophet  
hie widerumb/ seiner art nach/ die zwo tafeln Mosi sein  
zu hauff. Den das die feind sagen/ wo ist ihz Gott/ solchs  
ist ein sünd wider die ersten Tafel/ vñ das sie blut uergieß-  
sen/ ist ein sünd wider die ander Tafel/ wie oben auch ge-  
meldet. So nun weder glauben/ noch leben an solchem  
feind gut vnd recht ist/ wie ist es möglich/ das Gott nit  
ein mal drein schlagen/ vnd seinen zorn wider ihn solt se-  
hen lassen?

Gleich aber/ wie der Türck solches morden lang  
h 2 triben



triben / vñnd der Chriſtenheit mer ſchadens mit dem  
ſchwerd thun hat / den nie kein feind. Wie Daniel von jm  
meldet. Er werde mechtiger ſein / den die vorigen Reich /  
vñnd das die Chriſten ein zeit lang / in ſeine hende ſollen ge  
ben werden. Also würd er auch einer andern vñnd hefft  
gern ſtraffe müſſen gewarten. Denn andere tyrannen /  
ſo die Chriſtenheit plaget habē / mit den ſelben iſt es gemei  
ner weyſe abgangen / dz ſie Gott wider demütiget / vñ jñē  
bezalet hat / wie ſie andern thun haben / hat ſie aber den  
noch bleiben laſſen. Solche ſtraffe ſol dem Türckē vil zu  
ſanfft vñ linde ſein. Der Jungſte tag gehört auff ihn / vñ  
dz gericht / wie Daniel am 7 ſagt. Derhalb ob gleich Got  
jm dem ſig mit der zeit / auch brechen / vñ jmer gemach / je  
lenger je mer / mit vnſal in würdt drücken / ſo ſol doch das  
ende des Türcken der jungſte tag ſein. Wie Paulus  
dem Papſt auch dröwet / das Gott mit ſeiner herlichen  
zukunft / mit jm ein ende werde machen. Denn weyl  
Papſt vñnd Türck / zu gleich wider Chriſtum / vñnd ſein  
Kirchen toben / der mit dem ſchwert / jhener mit yr  
thumb / vñnd bedeleſterer des bluts vnſers Herrn Jeſu  
Chriſti ſind / müſſen ſie gleiche ſtraff mit einander leys  
den. Vñnd iſt auß der weiſſagung Danielis zu uermus  
ten das wir vor dem Jungſten tag / von ſolchem feinden  
nit werden gẽtzlich erlöſet werden / Ob wol der Türck  
eben wie der Papſt ein zeit lang her / fallen / vñnd abne  
men muß.

In diſem Vers aber / iſt ſonderlich gute achtung zu  
haben auff die wort / das der Prophet ſein ſondere weys  
zu reden hat / vñnd bittet / Gott wolle das vergoffene blut  
ſeiner knecht nit vngerochen laſſen. Denn ſolche art  
zu reden haben die Propheten von Moſe genommen / wel  
cher vom blut Abel ſagt / das es zu Gott geruffen / vñnd  
Got



Gott nit habe rügen lassen / biß das er den todtschlag  
am Cain rechte. Solches ist ser tröstlich / nit allein in  
dem / das es ein gewisse anzeygung ist / eines anderen le-  
bens nach disem leiblichen leben. Denn sonst würde der  
heylige geist nit sagen / das das blüt / so algereidt vergos-  
sen ist / schrie / vnd so laut schrie / das es Gott hörte / vnd  
Gott nicht rügen ließe.

Sonder es ist auch vber die massen tröstlich in dem  
fal / das Got damit anzeigt / er wölle in ewigkeit / solches  
jāmers / den wir auff erden leyden / vns ergetzen. Denn  
gedencke du jm nach / 8 Prophet bittet hie / Gott wölle dz  
blüt seiner knecht nit vngerochen lassen. So nun Gott  
mer nit thun / denn die feinde / auch wil würgen lassen /  
was hilfft solchs die bißher erschlagen / vnd jemerlich er-  
mordet sind? was hilfft es vns / die wir noch vbrig sind?  
es werden jeland vñ leut damit nit herwider bracht / ob  
wir gleich / wo hilff geschicht / vns nit mer so dörffen be-  
sorgen / noch fürchten?

Der halb muß je folgen / so Gott der verstorbenen  
Blüt jm der massen lest befolhē sein / das er neben der fein-  
de straffe / sie in ewigkeit gedencke wil. Wie im 15. Psalm  
stehet. Der tod seiner heyligen ist werd gehalten für  
dem Herrn. Das ist / er lest jm jr sterben gefallen / als ein  
kostliches gutes werck / ob es gleich für der welt ein groß-  
ser jāmer scheint. Vnd das darumb / sie sind knechte  
des Herrn. Das ist / sie erkennen Gott für ihren schöpf-  
fer / den Herrn Jesum Christum für ihren erlöser /  
vñ Gott den heyligen Geist für iren heyligmacher. Nun  
aber will Gott / als ein gnediger Herr / seinen knechten  
lohnē / vnd mer geben denn sie verdienet haben.

Weyl aber solchs hie auff erden nit geschicht / son-  
der sie vil mer / vmb solches glaubens willen leyden / vnd  
in



in fahr stehn müssen/ so folget gewißlich/ das solches im  
künftigen leben bey Gott sol geschehen/ auff das also  
der tod seiner heyligen ein edel/ vnnnd kostlich ding sey in  
Gottes augen.

Nun aber heisset die hebraisch schrift heyligen/ nit  
wie wir Teutschen/ vom heyligen vnschuldigen leben/  
oder guten wercken. Denn da selb kan es nit seyn/ wir  
müssen vns alle für buswürdige vnd arme sündler bekenn-  
nen/ wie der Herr spricht: Wenn jr alles thun habt/ so  
sagt/ wir sind vnnütze knecht. Sonder Heyligen haben  
den namen/ von der gnade/ so in widerfaren ist/ Als wenn  
wir sagen/ begnadete leut/ denen Gott günstig vnd gne-  
dig ist/ da er einen guten willen zu hat / vnd ihnen gutes  
thut. Weil aber solchs allein vns widerferet/ vmb vnnnd  
durch des Herrn Christi willen/ so sol solchs wort/ nit  
auff die werck/ welche alweg vnvolkomen/ vñ buswürdig  
sind/ sonder auff dē glaubē an Christū gedeutet werden.

xī.

Laß für dich komen das seufftzen der gefang-  
nen. Nach deinem grossen arm behalt die kinder  
des todts.

Im vorigen Vers hat er betten/ das Gott dz blüt/  
so albereit vergossen ist/ nit wölle vngeröchē lassen/ Weyl  
aber der Prophet/ ja der heilig Geist selb/ solches bittet/  
ist es ein gewiß anzeigung/ das im Gott solches blüt wöl-  
le lassen befolhen sein/ vñ an den feinden rechnen. Yetzund  
bittet er für das arme vnd ellende volck/ so der feind in  
seiner gewalt gefangen helt. Das ist doch je auch ein nö-  
tige bitt/ weil wir mit nichten solchen armen leuten sonst  
helffen können/ das wir doch mit ein Vater vnser ihz ge-  
dencken/ das sie Gott erhalten wölle.

Nun



Tunmachtes der Propheten sehenlich / das er spricht / Laß jr seuffzen für dich kommen. Will damit anzeigen / wie sie für dem feind ihres elends sich nit beklagen / noch mercken dörfen lassen / sonst würdens schreien / vñ recht klagen. Aber da müssen sie solchen jamer zu sich fressen / vnd nur mit den hertzen seufftzen. Nun weis der Prophet wol / dz solchs hertzlich seufftze / das sterck est vnd krefftigest gebett ist / derhalb bitter / das es Got hören wölle.

So aber solcher fürbit / die armen gefangnen leut bedörfft habē / vnter den Babilonier Regiment / welchs doch der Prophet Daniel / aller tugent halb vergleicht / dem gulden haupt. Wie vil mer / werden vnser arme Brüder / solcher vnser fürbit dörfen / vnter dem greulichen tyrannen dem Türcken / der sie genmarckt treybet / wie dz vich / verkauffts in frembde lender / auff die schiffe / zu harter vntreglicher dienstbarkeit / da sie vil erger gehalten werden / dē bey vns / hundert vnd klagen / ich geschweich aller schand vnd sünde / zu welchem sie das junge volck mißbranchen.

Aber es ist nit not / von solchem jammer vil zuschreiben / Deutschland ist nun mer solcher leut vol / so solchen jamer lange zeyt vnter den feinde gelidten haben. Derhalb / wie wir billich für vnser arme Brüder bitten sollē / als die Kinder des todts / die alle augenblick / in todes fahr sind / das sie Gott durch seinen grossen arm behalte / vnd ledigmache wölle.

Zu solchem gebet / solte vns bewegen / das hertzliche seuffzen der armen leut / wenn wir nur mit fleis bedächte / warumb sie so seuffzen. Denn da ist es erstlich darumb zuthun / das sie gern wider ledig / in irem vatterland / bey weyb vnd kinden / vnd ein jeder bey dem seinen in guter  
ruhe



ruhe weren / da sie ihr brod vnd narung haben / oder mit ehren gewinnen könden. Solchs sind eytel grosse gaben / da wir billich Gott alle tag / für dancken solten / vnd bitten / das er vns darbey erhalten / vnd vor solcher Tyrannischer gefengniß behütten wölle.

Darnach würdt on zweyfel / auch ein herliches verlangen sein / das sie / wo es nit möcht öfter sein / doch nur einmal / vnter vnd bey Christen sein / mit Christen betten / das Sacrament entpfahen / predig hören / sich mit Gottes wort inn so armseligem enlenden leben / trösten möchten lassen. Aber da ist es ihnen alles genommen / on was ider man / aus der predig gemercket / vñ in sein hertzen behaltē hat. Vñ kan woll sein / wo sie zu solchē Christlichē werck en sich nit fleissig gehalten haben / dz ihnen der vnmuth vñ das leyd dest grosser / vnd vntreglicher würdt. Es solte aber je solches vns bewegen / das wir / die noch solche güter reichlich / vñnd für der thur haben / der selben vns mehr vnd fleissiger brauchetē / lieber gen predigt gingen / vnd öfter zum heyligen Nachtmal des Herrn Christi vns fünden. Thun wir es nit / wer weys / wie Gott solchen vndanck entlich an vns straffen würd?

XII.

Vnd vergilt vnsern nachbarn sibenfeltig in ihren büßem ihre schmach / damit sie dich Herr geschmehet haben.

Bissher hat er wider die feind gebettē / vnd für sein volck. Wie bittet er auch wider die vntrawe nachbarn / so sich dises vnglücks freweten / vnd der Jüden drob spot teten / vnd sie schmechten. Gerad wie vnser verstockte Papisten auch thun / lachens in die faust / wo ein vnglück wider



wider die Lutherischen (Wie sie vns nennen) sich auffdrehet. Solchs müssen wir leyden/ vñ können es nit wendē/ wie wolles vber die masse wehe thut. Aber Gott kan vnd wil es wendē. Vñ wie der Prophet hie meldet/ sißēfeltig/ das ist/ hart gnug straffen. Den̄ weil sie vns/ des worts oder der lehr halb feind sind/ vñnd aber solchs wort vñnd lehr/ Gottes wort vnd ein himlische lehr ist/ vom Herrn Christo selb/ der welt offenbaret / so wil Gott solcher schmach sich annemen/ damit sie vns schmehen/ vnd die freud ihnen saur gnug machen/ welche sie auß vnserm leyd geschöpft haben.

Es ist yetz in disem anzug etlichem kriegs volck ein schad auff der Tonaw widerfaren/ da war diß dz erste wort/ das die Papisten sageten: Bey den Lutherischen ist weder glück noch heyl. Aber lieben Papisten/ nemet euch ein wenig der weyl/ sehet hinder sich/ fasset ein jar nach dem andern für euch/ was habt doch ihr für glück bis her gehabt/ welches ihr ewrem Bepstischen glauben zu ehren rümen kondt. Vngern/ vñ andere nachgelegne land können leyder/ von solchem glück nur zu vil sagen. Vnd ist dahin kōmen/ was weyse vnd vernunfftige leut vnter euch sind/ die bekennen es frey/ vnd on scheu/ das weder glück/ noch heyl mer bey euch sein wölle. Aber wie Pharaothet/ welchen Gott mit einer straff nach der andern zum gehorsam wölte treibē/ aber doch nichts kondt außrichtē/ also thut jr verstocktē Pharaonischē Papistē auch. Wen̄ euch Got gleich ein liecht anzündet/ dz so hell in der nacht leuchtet/ als were es hoher mittag/ so bleibt jr doch stock blind/ vnd sehet eben als wenig/ als wer es eitel stick finster nacht. Got erbarme es/ das sein wort so gar on alle frucht so lange zeit her/ sol geprediget sein.

Wir



Wir aber dein volck, vnd schafe deiner weid/  
dancken dir ewiglich/ vnnnd verkündigen deinen  
rhum für vnd für.

Der heylig Geist beschleust das gebet mit einer  
dancksagung vns zum gewissen trost/ das wir nit zweiff-  
len sollen/ wenn wir im nachbetten/ es sol das gebet erhö-  
ret sein. Darumb braucht er gar vil andere wort denn  
vor. Oben redet er kleglich/ Gottes erbe werde zerissen/  
der heylig Tempel verunreinigt/ vnd Hierusalem sey  
ein steinhaußen/die Heyligen werden gemördet/ vnnnd  
blut vergossen wie wasser. Das heist/ die schaffe durch  
dorn vnd hecken geführt/ das sie kein ganzes pleglin an  
irer haut behalten. Aber hie kret er alles vmb/ vnnnd  
spricht: Du bist vnser hirt/ vnd wir sind deine schafe.  
Wir als schafe/halten vns zu dir/ vnd gewarten deiner  
hilffe. Du aber als vnser hirt/ weydest vns mit deinem  
wort/ vnd bewarest vns vor allem vnfall mit deinem stab/  
das ist/mit deinem reich vnd macht/der halb wir billich  
dir ewig dancken/vnd verkünden dein lob für vnnnd für/  
das du vns arme elende leutlin/ zu gnaden wider ange-  
nomen/den feind gestraffet/vnd vns geholffen hast.

Vnd diß ist der rechten Gottes dienst einer/ die wir  
Christen vnserm Gott leisten sollen. Gehet es vbel/so sol-  
len wir zu Gott durch Christum rüffen/vnd hilff gewar-  
ten. Gehet es vns wol/das die hilff auff das gebet sich fin-  
det/so sollen wir Gott rhümen vñ drum dancken. Sol-  
cher danck aber stehet nit allein in wortē/sonder auch im  
leben/vnd wercken/dz man friden/vñ allerley gutes/  
wz Gott gibt/nit mißbrauche/sonder Got zu ehren/ vnd  
dem nechsten zu nutz anlege. Solcher danck gefelt Gott  
wol/das er lust hat/je lenger je mer gutes zu thun. Wo  
aber



aber solcher danck nit folget / da zeucht Gott die gnade  
hand zu ihm / vnd leßt alles vnglück an die stat kōmen.

Vñ diß ist 8 stück eins / dz mir ein graven macht / wñ  
ich an dise gegenwertige not des Türckens halb / gedenc-  
cke. Den erstlich / wie ich ertlich mal gemeldet hab / ist es  
gewiß / dz Got den grossen mechtige vnbillichen mutwil-  
len der Papisten / nit würdt vngestraffet lassen / das die  
Bischove / welchen die kirch beuolē ist / im wenigste stück  
dem Euangelio nit wōllen weiche / sonder gedenccken wi-  
der Gott / vñ alle welt / jr abgötterey vñ mißbreuch zu er-  
halten / nur auß ein trutz / wider dz Euangelion. Mar-  
tern vñ plagē jre arme leut / dz sie wider jre gewissen / der  
abgötterey / vnd anders gewel sich müssen theylhafftig  
machē. Bearbeiten sich darnach wie sie jnen nur vil an-  
hangs vnter weltlicher Oberkeit mögen machen. Vnd  
lauffen jmer dar solche tuckische practiken mit / das man  
wol sihet / wo sie kōndtē / vñ Gott nit sonderlich wehrete /  
man würde nit vil / oder je nit lang vom Euangelio redē  
dōssen / ich geschweige wie es sonst in der kirchen mit Ce-  
rimonien / vñ anderm / würde zū gehen. So aber / wie ichs  
vñ hertzē glaub / Got / Got ist / vñ vnser lieber Herr Chri-  
stus zu der rechtē Gottes sitzet / ob gleich Got dem Tür-  
cken yetzund solte ein wenig abbrechen / so würdt er doch  
in andre weg solchen mutwillen straffen / vñ in die lenge  
nit leiden. Das ist ein stück / dz mir alle beysorg machet /  
das ich fürchte Teutschland sey vom Türcken noch nit  
gnug gestraffet.

Das ander ist / das ich besorg / wo gleich Gott seine  
gnad geben / vñ den feind zu ruck würde treyben / so wür-  
de doch dise frucht nit folgen / dauon der Prophet hie mel-  
det. Geschehen möchte es / dz man freudenfeur machen /  
vñ sonderlich die Papiste / mit glockē / orgeln vñ singē / vñ  
i 2 serm



sern Herrn Gott für den sig möchten danckē. Aber warlich / Gott achtet solches dancks wenig / ja gar nichts / es ist im vmb ein anders zuthun. Den̄ darumb gibt er frid / das man sein wort hören / vnd dem selben gehorchen / im recht dienē / kind vñ gesindt in Gottes fürcht auffziehen / vñ ein yeder sein brodt redlich / vñ mit gutem gewissen gewinnen könne. Wer sihet aber nit / wie die sachen noch stehen / So der Türck nit wer / vñ der Babst vñ sein geschworner hauff ruge hetten / dz sie die spitzen anderswo hinwenden / vñ sich noch Bas am Euangelio versuchen würdē. Solte den̄ Gott darumb den Türcken abtreibē / dz sein armes heufflin / hernach von iren nachbarn aller fahr gewarten / vnd alles vnglück leyden müste?

Vñ hie müssen wir gleich wol vnser selb auch nit vergessen. Man sihet wie es in der welt / bey allen stenden / vñ in allen hendlē stehet / Wie ein greuliche vntrew / betrug / falsch / geitz / vberseze / wie ein schwelgen vñ sauffen / ein prangen / vñ vberfluß allenthalb ist / vñ gesucht wird. So nun Gott fride solt geben / so besorge ich / es würde aller erst der mißbrauch in vollem schwang gehn / vñ yeder man sich duncken lassen / es hette Gott darumb friden geben / dz er seinem geitz / betrug / schwelgen / vnzucht / vñ andern außwarten könne. Den̄ so wir von solcher vnart nit ablassen / weil der feind noch vngeschlagen / vñ wir alle tage eines grossern vnglücks gewarten müssen / was wölte es wol werden / wo man sich weyter des Türcken halb / nichts besorgen dorfft? Vñ wer weiß / ob solchs ein vrsach ist / dz Gott solchē feind biß auff sein zukunfft wil bleiben lassen / auff das solches ergernuß nit zu weit einreisse / vnd doch etliche sich zur busse Begeben / mit betten vnd andern dest fleissiger sind?

Derhalb / wer es wol vñ nótē / dz wir vnser lebē anderst anschickē



ansichteten/vñ sonderlich disen fürsaz hetten/ wo Gott  
fride geben/vñ dem feinde etwz wölte abbrechen/dz wir  
solches fridens/nit/wie bißher wölten mißbrauchen/zur  
tyranny/vnd verfolgung des wort Gottes. Sonder dz  
die weltliche Oberkeit anfienge mit ernst sich des worts  
anzunemen/selb nit ergernuß den vñtherthanen mit ab  
götterey/oder andern lastern gebe/sonder alle ergernuß  
mit ernst an den vñterthanen straffete/dem teufflischen  
geyz/vnd wücher/sampt allen andern auffsetzen/vñ fi  
nanzen wehrete/vñ darnach yederman in seim stand vñ  
Beruff/nichts wider seim gewissen fürneme/zucht vñ er  
barkeit Bewarete / vnd vor allen dingen zur fürcht Got  
tes/vnd dem wort sich mit ernst hielte.

So wir solchs thetten/so würde es vns Gott gewiß  
lich geniessen lassen. Thun wir es aber nit/so hören wir  
in disem Psalm/wie Gott mit den sündern wölle vñge  
hen/so ihnen vergebens lassen predigen / vnd in sünden  
fort faren. Deñ so Gott der Juden nit verschönet/sond  
vmb der abgötterey/vnd ander sünden willen / sie auß  
dem land/vnder die Heyden hat weg führen/vñ dem meis  
ten teyl jemerlich erwürgē lassen/so würd er vnser auch  
nit verschönen/wenn wir in gleichen sünden/ one buß  
bleiben wollen.

Der halb mögen wir vnser gute acht haben / vñ das  
ergernuß vns nit verführen lassen/dz der meiste teyl keins  
warnung annimbt/noch sich bessert. Thut es dein Bi  
schone/Fürst/Oberkeit/vater/müter/herr/fraw/son/  
dochter nit/so thue du es. Vnd zweifel nit/ ob gleich der  
Türck alles (das ob Gott wil nit geschehen würdt) solt  
erobern/so würde dennoch Got dich/wie den Daniel vñ  
seine gesellen zu Babel/mitten vñter den Türcken/leyd  
licher vnd gnediger halten / denn andere vnbusfertige/



vnd deiner from̃keit dich geniessen lassen / wie der 41.  
Psalm sagt. Wol dem der sich des dörfftigen annimbt/  
den wird der Herr erretten / wenn es sonst vbel zugeht.  
Der Herr wirdt in bewaren / vñ beym leben erhalten/  
vnd im lassen wol gehn auff erden / vñ nicht geben in sei-  
ner feinde willen. Vñ Psal. 112. Wol dem / der den Herrn  
fürchtet / der grosse lust hat zu sein gebotten etc. Wenn ein  
plag kōmen wille / so fürchtet er sich nit / sein hertz hoffet  
vnverzagt auff den Herrn. Sein hertz ist getrost / vnd  
fürcht sich nit / biß er seine lust an sein feindē sihet. Solche  
schöne verheissung sollen vns billich vorgehn / vnd zu  
Gottes forcht / vnd aller gottseligkeit reizen.

Also haben wir disen Psalm kurtz vnd einfeltig auf-  
gelegt / so vil Got darzu genad geben hat / vñ ligt ferner /  
wie vor gemeldet / alles an disem / nach dem wir den rech-  
ten verstand darvon haben / dz wir ihn mit ernst / dem hey-  
ligen Geyst lernen nachbetten / vñ jmerdar auff die ver-  
heissung sehen / so wir im namen Jesu Christi den vatter  
etwas bitten / das wir gewis sollen erhört werden. Wer  
aber on solche verheissung bittet / er mach die wort so gut  
er wölle / so bettet er doch anderst nit / den Türcken vñnd  
Jude. Derhalb wundert michs sehr / weil Clausen Bisch  
of zu Wienn / disen Psalm auch fürgenommen / vnd ihm  
druck hat lassen außgehn / das man ihn / in diser not bettē  
sol / das er doch durch auß / nit mit einem wort / die leut da-  
hin weyset / das vns Gott vmb Christus willen / erhören  
vnd helfen wölle. So doch auch / in der alten kirchen diß  
gebreuchlich vnd on zweyffel / von den Aposteln her kōm-  
en ist / dz man alle Collecten oder gemeine gebet beschleuß  
set vngeferlich mit disen Worten / das Gott vmb seines  
Sons Jesu Christi willen / vns erhören wölle.

Aber / weyl solchs sinderlich heist im glauben betten / wē  
man



KRANTZ MEMORIAL LIBRARY  
LUTHERAN THEOLOGICAL SEMINARY  
PHILADELPHIA  
man vmb Christus willen / gewisse erhöhung wartet / vnd  
aber der Papst vñ sein hauff vom glauben nichts weys /  
vnd in vnser lehr nichts hefftiger ansichtet / den das wir  
die gerechtikeit / Gottes gnad / vnd ewiges leben / allein  
dem glauben an den son Gottes / vnsern Herrn Jesum  
Christum zueignen / So ist nit wunder / das ein Papist  
die leute leret betten / vñ doch nichts vom glauben leret /  
oder selb nit betten kan / sonder ob er wol vil wort machet /  
doch nit mit einem wort des Herrn Christi gedencet /  
durch welchen wir allein ein zutrit haben zum vater /  
Vnd wie Johannes der Tauffer zeuget / von welches  
fülle wir alle nemen gnad vmb gnad.

Vnser lieber Herr Gott helffe / vmb des selbigen  
vnser erlösers Christi Jesu / seines sons willen / durch  
sein heyligen Geist / das wir disen Psalm in gegenwert  
ger not recht nach betten / vnser leben bessern / vnd also  
von sünden / dem Türcken / vñ allem vnglück mögen er  
löset werden / vñ jm / als die schafe seiner weide / dancken /  
vnd seinnen namen ewiglich rühmen. Amen. Amen.

Gedruckt / vnd vollendet zu Nürnberg /  
durch Johan vom Berg / vnd Ulrich  
Neuber. Anno 1542. die Junij 7.